

# শ্রলয়ের আলো



শ্রীমন্তন কুমার

প্রকাশ করেছেন—

শ্রীহরীবোধচন্দ্র মজুমদার

দেব সাহিত্য-কুটার প্রাইভেট লিমিটেড

২১, বামাপুকুর লেন

কলিকাতা—৯

সেপ্টেম্বর

১৯৮০

৭

ছেপেছেন—

বি, সি, মজুমদার

দেব-প্রেস

২৪, বামাপুকুর রো

কলিকাতা—৯

মূল্য—

ট। ২'০০

# প্রলয়ের আলো

এক

বিকেল সাড়ে ছ'টা।

প্রথ্যাত প্রাইভেট ডিটেকটিভ দীপক চ্যাটার্জী তার গাড়িটা নিয়ে একটু বেড়াতে বের হবার জন্যে তৈরী হচ্ছিল।

এমন সময় ক্রিং...ক্রিং...

ওপরের ঘরে শোনা গেল টেলিফোনের শব্দ।

দীপকের সহকারী রতনলাল টেলিফোন ধরল দোতলার ঘরে বসে।

টেলিফোনের শব্দ দীপকের কানেও এসেছিল। তাই সে আর বেয় হতে চাইল না। একটু থেকে বের হওয়াই তার পক্ষে ভালো। দেখা যাক টেলিফোনটা আবার তার জন্যে কী বার্তা বহন করে এনেছে।

এক মিনিট পর।

রতনলাল নেমে এল একতলায়। গ্যারেজের সামনে দীপক চুপ করে দাঁড়িয়ে রতনলালকেই প্রত্যাশা করছিল।

—আজ আর বেয় হওয়া চলবে না বন্ধু।—হাসিতে হাসিতে রতনলাল বলে।

—কেন রে? হঠাৎ আবার কী হল?

—ঠিক জানি না। তবে আমাদের দীর্ঘদিনের বন্ধু পুলিশ ইন্সপেক্টর মিল্টার গুপ্ত দেখা করতে আসছেন।

—আমার কারণ কিছু বলেছেন কি?

—না। শুধু বললেন জরুরী ব্যাপার। অত্যন্ত আরজেন্ট। যেখানে যে অবস্থাতেই তুমি থাকিস না কেন, তোকে তার এখনি চাই।

প্রলয়ের আলো

—বেশ আমি তাহলে একটু অপেক্ষা করি। তুই কি বলিস ?

—গুপ্ত অপেক্ষা নয়, আমার মনে হয় নতুন কোন কেস হয়ত হাতে নিজে হবে। উঃ! কাজের পর আবার কাজ? একটা কেস সলুত্ হওয়ার সাথে সাথে আর একটা এসে পড়ে; এক মুহূর্তও বিশ্রাম নেবার উপায় নেই।

দীপক হেসে বলে,—তা তো দেখাই যাচ্ছে। কিন্তু তাই বলে আমার বন্ধুর যেন অমর্যাদা না হয়।

—অমর্যাদার কথা আবার এলো কোথা থেকে ?

—মানে আমি বলছি কি, ভজুয়াকে বলে কিছু ভালো খাবারের ব্যবস্থা করে রাখিন। মনে আছে তো, মিঃ গুপ্ত একটু ডিমের ভক্ত বেশী।

কথাটা শুনে রতন হোহো করে হেসে উঠল। তারপর বলল—হ্যাঁ, সেই-জন্তেই লালবাজারে অনেকে মিঃ গুপ্তকে এগ-গুপ্ত বলে ঠাট্টা করেন। আশ্চর্য্য, দিনে দশ পনেরটা ডিম উনি কেমন করে হজম করেন ?

দীপক বলে,—এ পৃথিবীতে অভ্যাস করলে হয় না কী ? অভ্যাসের জোরে মানুষ অক্লান্ত শক্তি আর সাহস পেতে পারে; আর ও তো সামান্য ডিম হজম করা।

হুজনে ধীরে ধীরে ভেতরের দিকে পা বাড়ায়।

এর ঠিক পঁচিশ মিনিট পরের কথা।

ইতিমধ্যে দোতলায় পরিপাটি করে সাজানো হল-ঘরে দীপক মিঃ গুপ্তকে নিয়ে গিয়ে বসিয়েছিল।

চাকর ভজুয়া দু প্লেট ডিম সেক, চারটে ডিমের ডেভিল, মাংসের শিঙাড়া আর দু পেয়লা চা দিয়ে গেল।

একসাথে এতগুলো ডিমের দর্শন পেয়ে খুবই খুশী হলেন মিঃ গুপ্ত।

অত্যন্ত অল্প সময়ের মধ্যে ডিমগুলো শেষ করে চায়ের পেয়ালায় চুমুক দিয়ে বললেন,—এবার শুনুন আমার কাহিনী।

দীপক ও রতন মনোযোগ দিল মিঃ গুপ্তের কথায়।

মিঃ গুপ্ত বলতে শুরু করলেন,—অনেকদিন তো এ লাইনে আছেন মিস্টার চ্যাটার্জী কিন্তু দস্য প্রলয় নামে কোন এক দুর্দান্ত দস্যর নাম শুনেছেন কি?

দীপক চিন্তিত হল।

একটু ভেবে দীপক বলল,—দস্য প্রলয়ের সঙ্গে আমার পরিচয় দীর্ঘদিনের নয় মিস্টার গুপ্ত। একজন ছদ্মবেশী দস্যর সঙ্গে আমার কিছুদিন সাক্ষাৎ হয়েছিল, কিন্তু সেই দস্যই আপনাদের দস্য প্রলয় কিনা তা সঠিক বলতে পারব না।

মিঃ গুপ্ত হেসে বললেন,—এই দস্য প্রলয় হচ্ছে শিক্ষিত বৈজ্ঞানিক বুদ্ধি-সম্পন্ন একটি দস্য। এর দলে যে কত লোক কাজ করে এবং এর ক্ষমতা যে কত বেশী, তা সঠিক বলতে পারব না। তবু আমরা একে ভয় করি।

এর পেছনে লোক লাগিয়েছি। বিখ্যাত গোয়েন্দারা ঘণ্টার পর ঘণ্টা এই দস্যকে অনুসরণ করেছে, কিন্তু তবুও তারা এখনও একে গ্রেফতার করতে সক্ষম হয়নি।

—এর পূর্ব ইতিহাস কিছু জানেন?—দীপক প্রশ্ন করে।

—যেটুকু শুনেছি তাতে জানতে পেরেছি এই দস্য এর আগে আফ্রিকা মহাদেশের কয়েকটা অঞ্চলে তার আধিপত্য বিস্তার করেছিল।

—তারপর?

—তারপর রেপ্তনেও সে বেশ কিছুদিন সদলবলে কাজ করেছিল বলে শোনা যায়।

—কিন্তু দস্য প্রলয়ই কি এর চিরদিনের পরিচয়?

## প্রলয়ের আলো

—না। এর আগে এ বিভিন্ন নামে বিভিন্ন জায়গায় কাজ করেছে বলে আমরা সংবাদ পেয়েছি।

—প্রলয় নাম সে কতদিন গ্রহণ করেছে জানেন?

—না। তবে এর বিষয়ে অনেক খুঁজে পেতে যে ইতিহাস সংগ্রহ করেছি তা সংক্ষেপে বলতে পারি।

দীপক হাতঘড়ির দিকে একবার আড়চোখে চেয়ে বলল,—আমার হাতে এখনও যথেষ্ট সময় আছে। বলুন। শোনা যাক আপনার কাহিনী।

মিঃ গুপ্ত বলতে থাকেন :—

—প্রলয় অত্র এক ছদ্মনাম নিয়ে উত্তর-পশ্চিম সীমান্তের অরাজক অঞ্চলে দীর্ঘদিন নির্বিঘ্নে ভয়াবহ গুণ্ডামি, খুন, রাহাজানি আর ধ্বংসের তাণ্ডবলীলা চালিয়ে যায়। সবচেয়ে ইন্টারেস্টিং ব্যাপার হচ্ছে, দিনের বেলায় এদের দলের লোকেরা অনায়াসে অত্যন্ত ভালো মানুষের মত সাধারণ মানুষের সাথে মিশে থাকে। তারপর রাত নামার সঙ্গে সঙ্গেই এরা এদের সুপরিকল্পিত ভয়াবহ ধ্বংসলীলার পথে এগিয়ে যায়।

—কিন্তু আজ পর্যন্ত এদের দলের কেউই কি ধরা পড়ে নি?

—না। এরা এক জায়গা থেকে অত্র জায়গায় এমনভাবে ঘুরে বেড়ায় যে, এদের সহজে ধরা যায় না। আর দিনের বেলায় দলের সকলেই গা ঢাকা দিয়ে থাকে। তাই কে যে এদের দলপতি পুলিশ শত চেষ্টা করেও তার কোন হদিস পায় নি।

—কিন্তু প্রলয়ের বিষয়ে আপনি সম্প্রতি এত চিন্তিত কেন?

—চিন্তার কারণ আছে দীপকবাবু।

—যথা?

—কিছুদিন আগে ভারতীয় পুলিশ জানতে পারে যে, প্রলয় নামধারী

একটি দস্যু তার দলবল নিয়ে উত্তর প্রদেশে হানা দিয়েছিল। সেখান থেকে পুলিশের তাড়া খেয়ে ওরা চলে আসে বিহারে। ওখানে নয় মাসে প্রায় তিন চার লক্ষ টাকা লুণ্ঠন করেছে ওরা। কোলকাতা পুলিশের গুপ্ত বিভাগের ধারণা এই যে ওরা হয়ত অতি শীঘ্রই কোলকাতার বুকে হানা দেবে।

—কিন্তু কোনও প্রত্যক্ষ প্রমাণ তো পায় নি.....

—প্রমাণ না পেলেও আমাদের কাজ চালাতেই হবে, মিস্টার চ্যাটার্জী। ওরা সারা ভারতের বুকে এমন ভয়, আতঙ্ক আর বিভীষিকার সৃষ্টি করেছে যে এদের বিরুদ্ধে অবিলম্বে উপযুক্ত ব্যবস্থা অবলম্বন করতেই হবে।

—তা তো বুঝলাম। কিন্তু কোন নির্দিষ্ট কর্মপন্থা অবলম্বন না করলে কারও বিরুদ্ধে এগোনো কত শক্ত, তা তো জানেন আপনি।

—জানি নিশ্চয়ই! কিন্তু ওপর থেকে ক্রমাগত এমন চাপ আসছে যে, আর বসে থাকা যায় না।

—আপনারা কি করতে চান, মিস্টার গুপ্ত?

—আমরা চাই কোলকাতার সমস্ত সন্দেহজনক এলাকাগুলো সার্চ করে দেখতে। কিন্তু এত অল্প সময়ে তা কী করে সম্ভব বলুন! কোলকাতায় তো আর দুটো-একটা সন্দেহজনক জায়গা নেই—ক্রিমিনালস্ ডেন্ আছে প্রায় শ' খানেক।

—আচ্ছা একটা কাজ করলে হয় না, মিস্টার গুপ্ত?

—কী কাজ, বলুন?

—আমরা সব দিক থেকে এমনভাবে প্রস্তুত থাকব যে, কোথাও কোন অস্বাভাবিক ঘটনার সঙ্গে সঙ্গেই ওদের দু-একজন পাণ্ডাকে জালে আটকে ফেলতে পারব।

—কিন্তু এদের দলের পাণ্ডা মাত্র একজন।

প্রলয়ের আসলো

—কে সে ?

—দহা প্রলয় ।

—কিন্তু তার পরিচয় তো আপনি এখনও কিছু জানেন না ?

—জানি না বলেই তো জানবার জঙ্গে আপনার শরণাপন্ন হয়েছি ।

—আমাকে কী করতে হবে, মিষ্টার গুপ্ত ?

—আপনার কাজ হবে ওদের দলের সব গুপ্ত খবর সংগ্রহ করার ব্যবস্থা করা ।

—কিন্তু আমি কোন বিবরণই তো জানি না ।

—হয়ত সবটাই একটা আতঙ্কের ফল । ভগবান করুন প্রলয়ের দল যেন কোলকাতায় না আসে ।

দীপক হাসে মুহূ হাসি ।

মিঃ গুপ্ত প্রশ্ন করেন,—আপনি হাসছেন কেন, মিষ্টার চ্যাটার্জী ।

—কারণ নিশ্চয়ই আছে ।

—যথ ?

—আমার উপরে আপনি যে দায়িত্বের ভার অর্পণ করেছেন তার অর্থ হচ্ছে হাওয়ার সঙ্গে যুদ্ধ করা ।

—যা করতে একমাত্র আপনিই পারেন, সেই কাজই আপনাকে দিয়ে করাতে চাই, মিষ্টার চ্যাটার্জী ।

দীপক আবার হাসে রহস্তের হাসি । সে হাসির অর্থ হচ্ছে—দেখা যাক, অদূর ভবিষ্যতের গর্ভে কী রহস্য লুকিয়ে আছে !

## দুই

বিখ্যাত ধনী রায়বাহাদুর শ্রামল সেন অস্থিরভাবে পায়চারি করছিলেন তাঁর বিভিন্ন স্ট্রিটস্থ বাড়িতে।

কিছুদিন আগেই তিনি সেদিনের ডাকে পাওয়া কয়েকখানি চিঠির উপর দ্রুত চোখ বুলাচ্ছিলেন। এমন সময় তাঁর চোখ পড়ল অদ্ভুত সুরু একটা নীল রঙের খামের উপর।

সামান্য একটা খাম। কিন্তু তা যেন নিমেষের মধ্যে শুবে নিল তাঁর মুখের সবটুকু রক্ত।

খামের কোণে আঁকা একটি প্রজাপতির ছবি। সাধারণ যে কোন লোক প্রজাপতিটা দেখে মনে করবে এটা বোধহয় কোন বিয়ের চিঠি।

কিন্তু একমাত্র রায়বাহাদুর জানেন এর মধ্যে কী আছে। এটা যে বিখ্যাত দস্যু প্রলয়ের চিঠি, তা বুঝতে তাঁর মোটেই কষ্ট হয় না। তাঁর অতীত অভিজ্ঞতা তাঁকে মনে করিয়ে দেয় যে এ সেই অদৃশ্য দস্যু প্রলয়ের লেখা।

ছুরি দিয়ে খামটা কেটে ভেতরের চিঠিটা বের করে নিলেন তিনি।

সামান্য কয়েকটি লাইন মাত্র লেখা, কিন্তু তাতেই যেন তাঁর মধ্যে এনে দিল একটা অদ্ভুত পরিবর্তন।

ধীরে ধীরে তাঁর মুখের মাংসপেশী কঠিন হয়ে উঠল। অগ্নিগোলকের মত জ্বলতে লাগল তাঁর চোখ দুটি।

মাত্র কয়েকটি মুহূর্ত।

তারপরেই চিঠিটা মেঝের উপর ফেলে দিয়ে চিৎকার করে উঠলেন,—না না, এ হতে পারে না। এ অসম্ভব। এ অসম্ভব।

প্রাণপণে নিশ্চিন্ত হবার চেষ্টা করে তিনি পাইপটা ধরালেন। কিন্তু আবার চোখ গিয়ে ঠিকরে পড়ল মেঝের উপরের চিঠিটার উপর।

আবার চিঠিটা হাতে তুলে নিয়ে পড়তে শুরু করলেন রায়বাহাদুর।

প্রলয়ের আলো

তাতে লেখা :—

প্রিয় প্রণয় নিয়োগী,

জীবনে অনেক অদ্ভুত কাজই তুমি করেছ। তবে সবচেয়ে অদ্ভুত হচ্ছে



চিঠিটা হাতে তুলে নিয়ে পড়তে শুরু করলেন...

[ পৃষ্ঠা ২০ ]

তুমি নিজে। আজ তুমি নাম পালটে প্রাণপণে শ্যামল সেন হবার চেষ্টা করছ-  
বটে, কিন্তু একটা মারাত্মক ভুল তুমি করে বসেছ একটা জায়গায়।

তোমাকে চিনতে আমার কষ্ট হয় নি একটুও। আজ যদি আমি তোমার  
আসল পরিচয় প্রকাশ করে দিই সকলের কাছে, তবে তোমার পুরোনো ঘৃণিত-  
দিনের কথা স্মরণ করে সবাই আতঙ্কে শিউরে উঠবে।

আজ যদি তুমি বিশ বছর আগেকার দিনে ফিরে যাও, তবে তোমার এত  
ঐশ্বর্য সব বৃথা প্রতিপন্ন হবে। লোকে জানবে তুমি ঘৃণিত, নীচ একটি খুনী  
মাত্র।

কিন্তু তাই কি তুমি চাও ?

যদি এই ঘোর দুর্বিপাক থেকে নিজেকে রক্ষা করতে চাও, তবে কিছু টাকা  
তোমায় খরচ করতেই হবে।

ভুলো না যে তোমার অল্প উপায়ে উপার্জিত অর্থে অনেক দীনদুঃখী ছুবেলা  
হুমঠো খেয়ে বাঁচবে।

মাত্র বিশ হাজার টাকার খুচরো নোট একটা তাড়ায় বেঁধে আগামী পরশু  
রাত দেড়টার সময় গড়ের মাঠে মহুমেন্টের পশ্চিম কোণে রেখে আসবে। তা  
হলেই তা আমার হস্তগত হবে।

তা না হলে তোমার নিস্তার নেই বন্ধু। পুলিশকে জানাতে গেলেই এই চিঠি  
তাদের দেখাতে হবে। তাহলে পুলিশ জেনে ফেলবে তোমার পুরোনো পরিচয়।  
স্বতরাং সে চেষ্টা কোরো না।

এখন নিজের যা ভালো মনে হয় করো। আর একটা কথা, তোমার  
পুরোনো পরিচয় প্রমাণ করবার ক্ষমতাও আমার আছে। ইতি—

তোমার হিতাকাজী

প্রলয়।

প্রলয়ের আলো।

রায়বাহাদুরের হাত দুখানা কাঁপতে লাগল।

বিশ বছর পরে কালের হাতের স্পর্শে আজ তাঁর দেহের এমন অদ্ভুত পরিবর্তন হয়েছে যে, কেউ কোনদিন তাঁকে দেখে বিন্দুমাত্রও সন্দেহ করতে পারবে না যে, তিনিই অতীত দিনের প্রণয় নিয়োগী।

কিন্তু তবুও কী করে ওরা জানতে পারল তাঁর পুরোনো দিনের কাহিনী? কী করে আজ এ সম্ভব হয়েছে? তবে কি এই দম্ভ প্রলয় সত্যি কোন মায়াবী বা জাদুকর?

রায়বাহাদুর তাড়াতাড়ি গিয়ে দাঁড়ালেন একটা আয়নার সামনে। সমালোচকের দৃষ্টিতে পুঙ্খানুপুঙ্খরূপে তাকালেন নিজের প্রতিফলিত প্রতিবিম্বের দিকে।

নাঃ, সম্পূর্ণ অন্য লোক আজ তিনি। পেশীবহুল দেহেও যথেষ্ট পরিবর্তন। মাথায় টাক মুখে ফ্রেঞ্চকাট দাড়ি। রগের কাছে চুল পাকতে শুরু করেছে। অদ্ভুত এক গান্ধীর্বপূর্ণ প্রোচ তিনি আজ।

দরজায় খিল এঁটে একটা ড্রয়ার থেকে টেনে বের করলেন তিনি একটা বহু পুরোনো বাঁক। তার ভিতর থেকে বের করলেন একজন তরুণ যুবকের ছবি। কিন্তু ঐ ছবির সাথে আজ আর তাঁর কোন মিল নেই।

অনেকটা নিশ্চিন্ত হলেন তিনি। আজ আর কেউ প্রমাণ করতে পারবে না যে রায়বাহাদুর শামল মেন স্বয়ং প্রণয় নিয়োগী।

ধীরে ধীরে আবার একবার চিঠিটা তুলে নিলেন তিনি। ভালো করে উলটে-পালটে দেখতে লাগলেন সেটা।

নূতন কোন তথ্য আবিষ্কৃত হল না। খামের উপর শুধু বিডন স্ট্রিট পোস্ট অফিসের সীল দেখা গেল।

সেইদিনই পোস্ট করা হয়েছে চিঠিটা।

রায়বাহাদুর বুঝলেন পত্রপ্রেরক আশেপাশেই কোথাও গা-ঢাকা দিয়ে রয়েছে।

কিন্তু কে সে?

ধীরে ধীরে তাঁর মুখে ফুটে উঠল বিরক্তির রেখা। কেউ নিশ্চয়ই বাজে চিঠি লিখে তাঁকে ব্ল্যাকমেল করতে চায়। ওদিকে মন দিয়ে কোন লাভ নেই।

কিন্তু এ পৃথিবীতে কোন লোকই তো জানে না যে, তাঁর পূর্ব নাম ছিল প্রণয় নিয়োগী! তবে?

আর কে এই দস্যু প্রলয়?

এই কি সেই, যার সাথে উত্তরপ্রদেশে তাঁর একবার সংঘর্ষ হয়েছিল? হয়ত তাই।

আর যদি তা না হয় তবে এ চিঠি জাল। আবার ভাবতে শুরু করেন তিনি। বিন্দু বিন্দু ধাম ফুটে ওঠে তাঁর কপালে। তারপর এক সময় টুকরো টুকরো করে ছিঁড়ে ফেললেন চিঠিটা।

তারপর উঠে ঘরের খিল খুলে ব্যালকনিতে এসে দাঁড়িয়ে চাকর হরিকে ডেকে বললেন,—চা নিয়ে আস।

হরি চা নিয়ে এসে রাখল টেবিলের ওপর। তারপর তাঁর হাতে তুলে দিল একখানা কাগজ। বলল,—বাবু, এইমাত্র একজন লোক এই কাগজখানা দিয়ে গেল। বলল যে, এটা নাকি আপনার জরুরী চিঠি।

বিস্মিত রায়বাহাদুর কাগজটি খুলে দেখলেন তাতেও একটা প্রজাপতির ছবি জলজল করছে।

ছবির নীচে লেখা—

প্রণয় নিয়োগী,

তুমি যতই চিঠি ছিঁড়ে ফেলে নিশ্চিত হবার চেষ্টা করো, আমার প্রাণ্য-ঢাকা পুরোপুরি না পেলে তোমার নিস্তার নেই জেনো।

প্রলয়ের আলো

মনে রেখো, আমার দৃষ্টি রয়েছে তোমার প্রতিটি কাজের ওপর—তোমার সব গতিবিধির ওপর।

এমন কি, তুমি কোন্ বেশে, কোথায় দাঁড়িয়ে কী করছো, তা পর্যন্ত আমার দৃষ্টিগণ্ডির ভিতরে। এখনও শেষবারের মত তোমাকে সাবধান করে দিচ্ছি, যদি মান-সম্মান প্রতিপত্তি অর্থ নিয়ে বাঁচতে চাও, আমার সামান্য দাবিটি পূর্ণ কর।

আমার এই বিরাট সুসংবদ্ধ শক্তিকে যারা তুচ্ছ করে তারা তাদের ধ্বংসকে নিকটতম করে তোলে। ইতি—

তোমার হিতাকাঙ্ক্ষী

প্রলয়।

রায়বাহাদুর চাকরের উদ্দেশ্যে গর্জন করে উঠলেন,—যে লোকটা চিঠি দিয়ে গেল সে চলে গেল কোন্ পথে?

ভীত কণ্ঠে চাকর হরি বলল,—আজ্ঞে হজুর সে ত চিঠিটা দিয়েই একটা সাইকেলে করে তখুনি চলে গেল।

রায়বাহাদুর চিৎকার করে কী যেন বলতে গেলেন—কিন্তু তাঁর মুখে স্বর ফুটল না।

ধপ্ করে সোকায় গা এলিয়ে দিলেন তিনি। তাঁর হুচোখে যেন অকূল রাত নেমে এলো।

তিন

হোটেল প্যাম্‌চার।

চীনেপাড়ার অজস্র ঘোরানো পৈঁচানো গলি গোলকধাঁধায় ঘুরতে ঘুরতে সংকীর্ণ একটা জীর্ণ গলিতেও যে একটা হোটেল থাকতে পারে এটা হয়ত অনেকে কল্পনাও করতে পারবে না।

তবু এটা সত্যি ।

বিশেষ এক শ্রেণীর লোকের কাছে এই হোটেলটি বেশ লোভনীয় একটি বাসস্থান । ক্ষুদ্র, অপরিসর, প্রায়-অন্ধকার গলির বাসিন্দাদের সাথে এই হোটেলের লোক গুলিও যেন অভিন্ন ।

বহু পুরানো বাড়ি । চুন-বালি খসে খসে পড়ছে । দাঁত বেয় করে রয়েছে নোনাধরা ই টপ্পলো ।

বাড়িটার নীচের তলায় অনেকগুলো দোকান ও গুদাম । উপরের তলায় এই হোটেলটি ।

দোকানগুলোতে কোন খদ্দেরকে কখনও দেখা যায় না । তবে কী করে যে এদের দিন কাটে তা জানে না কেউ ।

হোটেলটিতে নানা শ্রেণীর এবং নানা বর্ণের এক বৈশিষ্ট্যপূর্ণ মিশ্রণ । যেন বিভিন্ন জাতির একটি সংক্ষিপ্ত প্রদর্শনী । কিন্তু এদের মধ্যে কে যে কি করে, তা নিয়ে কেউ মাথা ঘামায় না ।

আর মাথা ঘামিয়েই বা লাভ কী ?

এ বিরাট হোটেলের কোন গোপন কক্ষে যে কে বাস করে, সে সম্বন্ধে ধারণা করাও সাধারণ মানুষের কল্পনার অতীত ।

হোটেলের নয় নম্বর ঘরে রাত সাড়ে বারোটোর সময় গল্পের যবনিকা উঠল ।

ঢং করে বেজে উঠল একটা সময় নির্দেশক ঘণ্টা । সঙ্গে সঙ্গে ঘরে উপস্থিত প্রায় পনের জন লোক উঠে দাঁড়াল । সজোরে টিপল দেওয়ালের সঙ্গে দণ্ডায়মান একটা কাঠের পুতুলের ঠিক মাঝের অংশটা ।

ক্রি—ক্রি—ক্রি—ক্রি.....

বিচিত্র শব্দ ।

## প্রলয়ের আলো

দেখতে দেখতে সরে গেল ঘরের মেঝের কিছুটা অংশ। দেখা গেল বিরাট লম্বা একটা হুড়ঙ্গপথ। কিন্তু তা যে কোথায় গেছে তা কেউ জানে না।

হুড়ঙ্গপথটিতে ঘোরানো ঘোরানো একমার সিঁড়ি নীচের দিকে নেমে গেছে। নীচে—আরও নীচে। বুঝি পাতালের কোন অতল গহ্বরের সন্ধান পাওয়া যাবে এই পথ থেকে।

ভূগর্ভস্থ একটা কক্ষে গিয়ে পথটা শেষ হয়েছে। সেখানে অনেকগুলি বসবার আসন। একে একে সবাই বসে পড়ল।

সবাই স্তম্ভিত। বিশ্বয়ে হতবাক। বহুদিন পরে আবার তাদের ডাক এসেছে। তাদের অজ্ঞাতবাস করতে হবে না আর। কোন এক অন্ধকার ভাঙ্গা বাড়ির নিশাচর পাখিরা ডানা ঝাপটে উড়তে যাচ্ছে যেন। এবার শুরু হবে তাদের কর্ম। সাড়া দিতে হবে কাজের আহ্বানে। কিন্তু কী যে কাজ তা তারা এখনও জানে না।

ওদের মধ্যে মুহূর্ত কথাবার্তার গুঞ্জন উঠছিল। কিন্তু তা এত ধীরে যে বাইরের কোন লোকের কানে তা পৌঁছাবে না। ধীর কথাবার্তা শুনে শুধু মনে হচ্ছিল যে, এদের স্থির ধারণা, দেওয়ালেরও বুঝি কান আছে।

ওদের মধ্যে কয়েকজন হচ্ছে পুলিশের অতি পরিচিত মহাপ্রভু। অপর দু-একজন সম্বন্ধে যদিও পুলিশ নারব—তবুও জনসাধারণের কাছে বড় বেশী সন্দেহের পাত্র।

দেওয়ালের পিছন দিকে একটা বিরাট কালো পর্দার উপর আকাশ একটা প্রজাপতির বিরাট ছবি।

তার ঠিক নীচে চীনা হরফে যা লেখা তার অর্থ হচ্ছে—প্রলয়।

—ক্রিং—ক্রিং—ক্রিং.....

বেজে উঠল একটা অদ্ভুত শব্দ। পাতাল জুড়ে যেন আবির্ভূত হল, সর্বাঙ্গ কালো পোশাকে আবৃত, মুখে কালো মুখোশ পরা এক মূর্তি। ঘরের স্বল্প আলোয় মনে হচ্ছিল মূর্তিটির সারা দেহ যেন রোমাঞ্চ দিয়ে তৈরী। সে আবহাওয়াটার মাঝে কোলকাতা শহরের নামজাদা গুণ্ডা ব্ল্যাকমেলারদের বুকও কেমন যেন কেঁপে উঠল।

সবাই একসঙ্গে উঠে দাঁড়াল তাঁকে সম্মান দেখাবার জন্তে। এটা কারও নির্দেশে তারা করে নি, ভয় আর ভক্তি মিশে তাদের মনে এমন একটা ভাবের সৃষ্টি হয়েছিল যে, তারা যেন নিজেদের অজ্ঞাতেই কাজ করে চলেছিল।

কালো মূর্তিটি ধীরে ধীরে হাত নাড়ল। সবাই বসে পড়ল একে একে। ঘরের মধ্যে একটা সূঁচ পড়লেও বোধহয় তার শব্দ শোনা যেত, এমন শান্ত নীরবতা বিরাজ করছিল চারিদিকে।

সকলের একাগ্র দৃষ্টি সামনের দিকে নিবদ্ধ।

কর্কশ কণ্ঠে ভেসে এল কতকগুলো কথা—যা মনে অহেতুক একটা ভয় জাগায়। যা শুনে মনে হয়, যে কথাগুলো বলে চলেছে সে ভয়ানক—সে মূর্তিমতী বিভীষিকা। নির্মম। নিষ্ঠুর।

শোনা গেল—

বন্ধুগণ, বহুদিন পরে তোমাদের আমি ডাক দিয়েছি। নূতন কাজের জন্তই সমবেত করেছি তোমাদের। সে কাজ তোমাদের সামনে অপেক্ষা করছে।

এগিয়ে চলবে নিজেদের ওপর সম্পূর্ণ বিশ্বাস রেখে। তোমাদের সাফল্য সুনিশ্চিত। কর্তব্য পালন করলে তার উপযুক্ত মর্গদাকে তোমরা পাবে, এ বিষয়ে তোমাদের গ্যারান্টি দিচ্ছি। তোমরা জান, প্রলয় কোনদিন তার কথার খেলাপ করে না।

## প্রলয়ের আলো

প্রলয় আজ আর বেঁচে নেই বলে অনেকে মনে করে। অনেকে ভাবছে, আমার কোলকাতায় আমার কথা মিথ্যা। তাদের ঘুম এবার ভাঙবে। তারা জানবে আমি বেঁচে আছি। আমি ধ্বংসের নেশায় উত্তাল হয়ে উঠেছি। আমার কর্মপদ্ধতি কোথাও এতটুকু বাধাপ্রাপ্ত হবে না কোনদিন।

শুনেছি প্রখ্যাত ডিটেক্টিভ দীপক চ্যাটার্জী আর পুলিশ ইন্সপেক্টর মিস্টার গুপ্ত আমাকে ধরবার জন্যে ব্যগ্র হয়ে উঠেছে। কিন্তু তারা জানে না যে, আমার বিপক্ষে যারা দাঁড়াবে তাদের কাজের প্রায়শ্চিত্ত করতে হবে তাদের বুকের তাজা রক্ত দিয়ে।

দিকে দিকে আবার ছড়িয়ে পড়বে প্রলয়ের আতঙ্ক। মূর্খ পুলিশ আর গোয়েন্দার দল আমার সন্ধানে মিথ্যা ঘোরাঘুরি করে মরবে!

কিন্তু আমার কেশগ্র স্পর্শ করবার ক্ষমতা নেই কারও।

আর আমার কাজ হবে তাদের পাশে বসে তাদের কাজের উপর তীক্ষ্ণ দৃষ্টি রেখে এগিয়ে চলা। এবার থেকে প্রলয়ের নতুন অভিযান শুরু হবে কোলকাতার বুকে। আর তোমরা হবে আমার সে অভিযানের সহায়ক।

কিন্তু সাবধান বন্ধুগণ, বিশ্বাসঘাতকদের আমি একটিমাত্র শাস্তিই দিয়ে থাকি। সে শাস্তি মৃত্যুদণ্ড।

এখন তোমাদের কাঁ কাজ করতে হবে সে বিষয়ে কিছু উপদেশ দিই শোন।

এরপর যেসব কথা সেখানে আলোচিত হতে লাগল তা শুনে যে কোনও সভ্য মানুষের বুকই ভয়ে আঁতকে উঠবে। কিন্তু ওরা নিবিচারভাবে সব কথা শুনে যেতে লাগল।

## চার

খ্যাতনামা প্রাইভেট ডিটেক্টিভ দীপক চ্যাটার্জী তার সহকারী রতনলালের সঙ্গে কথা বলছিল তার ডুইংরুমে বসে।

সকাল সাড়ে আটটা।

হালকা হাওয়ার মৃদুস্পর্শে বাসন্তী আমেজ। শীতের দিন শেষ হয়েছে। বসন্ত আগতপ্রায়।

মিঠে রোদের সঙ্গে পাখির গান মিলে অকল্পনীয় আনন্দের আভাস।

রতনলাল বলল,—দীপক আজ পর্যন্ত তুই যে কয়টা কেসে হাত দিয়েছিস, প্রায় প্রত্যেকটিতেই সফলতা লাভ করায় সবার নিশ্চিত ধারণা যে, তুই হাত দিলেই যে কোনও রহস্যের সমাধান হতে বাধ্য।

দীপক হাসিমুখে বলে,—তুই ঠিক বলেছিস। গুরুত্ব ধারণা অনেকেরই আছে বটে।

—কিন্তু এই প্রলয়ের বিষয়ে ত আজ পর্যন্ত নতুন কোন তথ্য তুই আবিষ্কার করতে পারলি না।

—কে বললে ?

—অবশ্য আমি তো কিছুই জানি না।

—তোমার শোনার মত কিছু জানতে পারি নি বলে তোকে এখনও কিছু বলি নি।

—কী জেনেছিস বল না।

—কোলকাতা শহরের কতকগুলো নামকরা ক্রিমিনাল্‌স্‌ ডেনে পা দিয়েছিলাম আমি। তাদের সঙ্গে মিশে বেশী কিছু জানতে না পারলেও দু-একটা কথা জানতে পেরেছি।

## প্রলয়ের আলো

—যথা ?

—প্রথম কথা দস্য প্রলয় কোলকাতার বৃকে পা। দিয়েছে, একথা ঠিক।

—কতদূর কাজ করেছে সে ?

—বিশেষ কিছু না। দুসারটে ভয় দেখানো চিঠি ছেড়েছে আর তার দলবলকে একত্রিত করে বড় বড় উপদেশ শুনিয়েছে।

—তার দলের কারও সঙ্গে তোর আলাপ আছে বোধহয় ?

—ঠিক ধরেছি।

—তাহলে তো কাজের অনেকটা সুবিধে হয়ে গেছে। তাই না ?

—অনেকটা। কিন্তু একটা বিষয়ে—

কথা শেষ হয় না।

বাইরে শোনা গেল অচেনা পদশব্দ। দীপক রতনের দিকে চেয়ে বলে উঠল,—অচেনা পদশব্দ শোনা যাচ্ছে মনে হল। বোধহয় কোন অচেনা বন্ধু।

তার কথার সত্যতা প্রমাণ করে ঘরের মধ্যে আবির্ভূত হলেন একজন অজানা ভদ্রলোক। মাথায় টাক। পরনে দামী স্ফাট। চোখে মুখে অপরিমিত ব্যস্ততার চাপ। চেহারা দেখে বেশ অভিজাত বলেই মনে হয়।

দীপক এবং রতন মুখ তুলে কোন কথা বলবার আগেই আগন্তুক ব্যস্ত-সমস্ত ভাবে বলে উঠলেন—আমাকে আপনি চেনেন না দীপকবাবু। তাকে পরিচয় দিলে হয়ত চিনতে পারবেন। আমারই নাম রায়বাহাদুর শ্রীমল সেন।

দীপক হেসে বলে,—ও হ্যাঁ, এবার আপনাকে চিনিছি! আপনার নাম শুনেছিলাম আগেই। আপনি বিডন স্ট্রীটে থাকেন; তাই না ?

ভদ্রলোক হেসে বলেন,—মনে রেখেছেন দেখছি। আমার মত ক্ষুদ্র ব্যক্তিকেও যে চেনেন, আশ্চর্য।

দীপক বলে,—না, এতে আশ্চর্য হবার কিছুই নেই। উঁচু মহলে আপনার

বেশ নামডাক আছে। কিন্তু দেখে মনে হচ্ছে যে, আপনি কোন কারণে খুব বেশী বিচলিত হয়ে পড়েছেন। তাছাড়া কখনো বিনা কারণে এ দরিদ্রের কুটিরে আপনার মত লোকের পদার্পণ হবে না, তা জানি। এখন যদি ধীরে স্থস্থে জিরিয়ে নিয়ে কারণটি ব্যক্ত করেন তো বাধিত হই। অবশ্য আপনাকে আমি সাহায্য করতে পারব কিনা তা অনেকটা নির্ভর করছে ওই কারণটির উপর।

একটু থেমে দীপক আবার বলে,—দেখুন, একটা কথা আগে থেকেই বলে রাখি, রায়বাহাদুর। টাকার লোভ দেখিয়ে আমাকে কাজে নামাবেন একথা যদি আপনি ভেবে থাকেন তবে আপনি ভুল বুঝেছেন।

—কেন?

—কারণ হচ্ছে এই যে, আমি একজন ক্রিমিনোলজিস্ট ইন্‌ দি ট্রু সেন্স। ছোটখাট চুরি-বাটপাড়ি নিয়ে মাথা ঘামানো আমার পেশা নয়। কোন বড় ক্রাইম যেখানে অহুষ্ঠিত হয়, কিংবা হবার উপক্রম হয়, সেইখানেই আমার দেখা পাবেন আপনি।

—বুঝছি।

—যাক আপনার কেসটার বিষয়ে এবার আমাকে সংক্ষেপে বলুন।

রায়বাহাদুর বললেন,—ঠিক বলেছেন আপনি মিস্টার চ্যাটার্জী। এতদিন আপনার নামই কেবল শুনে এসেছি—আজ সাক্ষাৎ পরিচয় হয়ে অত্যন্ত আনন্দিত হলাম। এই হল উপযুক্ত লোকের মত কথা। এখন শুধুন সংক্ষেপে আমার কেসটি। মনে হয়, আপনি একবার শুনলে আমাকে নিশ্চয়ই এড়াতে চাইবেন না।

দীপকের কোঁতুহল অনেকটা বেড়ে যায়। ধীরে ধীরে সে বলে,—বলুন, আপনার কেসের বিষয়ে শোনা যাক।

প্রলয়ের আলো

রায়বাহাদুর বলতে শুরু করলেন,—তিন দিন আগে সকালে অনেকগুলো চিঠি ঘাঁটতে ঘাঁটতে আমি খামের ওপর প্রজাপতি আঁকা একখানা চিঠি পাই।

—চিঠির প্রেরক কে?

—প্রেরকের নাম শুধু লেখা আছে—প্রলয়।

—প্রলয়?

দীপক ও রতন আনন্দে লাফিয়ে ওঠে। কোতূহলপূর্ণ কণ্ঠে দীপক বলে,—  
তারপর?

—চিঠিতে নতনত্ব বিশেষ কিছু ছিল না। সাধারণ ভয় দেখিয়ে টাকা আদায় করবার ফন্দী ছাড়া আর কিছুই চোখে পড়ে না। তবে অত সহজে ভয় পাবার ছেলে আমি নই। আমি চিঠিটাকে মামুলী মনে করে ছিঁড়ে ওয়েস্ট পেপার বাস্কেটে ফেলে দিই এবং ওটা নিয়ে মাথা ঘামানো বোকামি ভেবে ও বিষয়ে আর মাথা ঘামাই না।

কিন্তু তার কয়েক মিনিট পরেই পেলাম দ্বিতীয় চিঠি। আমার চাকরের হাত দিয়ে পাঠিয়েছিল সে চিঠিটা।

—আপনি তখন কী করলেন?

—আমি কিছুই করলাম না তখন। ভাবলাম ওদের বিরুদ্ধে সব কথা পুলিসকে জানাব।

—এর কি আপনার উপর নজর রেখেছিল?

—দ্বিতীয় চিঠিটা পড়ে তো তাই মনে হল।

—তারপর?

—পরের ঘটনা কাল রাতে। সন্দের পর খাওয়াদাওয়া করে আমি বাইরের বারান্দায় একটু পায়চারি করি। এটা আমার বহুদিনের অভ্যাস। কালও ঠিক খাওয়াদাওয়ার পর একটু ঘুরে বেড়াচ্ছিলাম।

আমার মাথায় ছিল নাইট ক্যাপ ও পরনে নাইট ড্রেস। একটা রিভলভারের গর্জনে হঠাৎ আমি চমকে উঠলাম। ভয় পেয়ে চুপচাপ বসে পড়লাম আমি। দেখলাম ওপাশের রেলিং থেকে একজন লোক মাটিতে লাফিয়ে পড়ে ছুটতে ছুটতে পথে গিয়ে পড়ল। তার সারা দেহ কালো পোশাকে আবৃত থাকায় তাকে চিনতে পারলাম না।

তারপর হঠাৎ নাইট ক্যাপটায় হাত দিয়ে দেখলাম গুলিটা টুপি ভেদ করে চলে গেছে। এটা মস্তবড় সৌভাগ্য বলতে হবে।

শয়তানের প্রথম চেষ্টা হয়ত ব্যর্থ হয়েছে কিন্তু এরপর তারা সাফল্য অর্জন করবার চেষ্টা করবে। তাই সাহায্যের আশায় আপনার শরণাপন্ন হয়েছি দীপকবাবু। আশা করি নিরাশ হব না।

দীপক কোনও কথা না বলে অকস্মাৎ ড্রয়ার থেকে পিস্তলটা নিয়ে জানলার দিকে লক্ষ্য করে একবার পিস্তল ছুড়ল।

প্রচণ্ড শব্দ। ধোঁয়া উঠল অনেকটা।

জানলার বাইরে শোনা গেল ধূপ করে একটা শব্দ।

তিনজনে বাইরে বেরিয়ে দেখল একজন লোক সাইকেলে করে পালিয়ে যাচ্ছে। তার অপস্রয়মান মূর্তিটির দিকে চেয়ে রতন দীপককে জিজ্ঞাসা করল,  
—ওকে অনুসরণ করব নাকি?

দীপক হেসে বলে,—না থাক।

—কেন?

—ওসব ছোটখাট চুনোপুঁটির নিয়ে মাথা ঘামালে আমার আসল লক্ষ্য যারা তারা সাবধান হয়ে যাবে।

তারপর দীপক ঘরে ঢুকে রায়বাহাদুরকে লক্ষ্য করে বলে;—আপনার কেস

## প্রলয়ের আলো

আমি গ্রহণ করলাম, রায়বাহাদুর। প্রলয়ের সাথে আমার সংঘাত শুরু হল।  
জানি না এর শেষ কবে হবে।

রায়বাহাদুর উচ্ছ্বসিত হাসির সঙ্গে বললেন,—ধন্যবাদ, দীপকবাবু। এই  
জন্মেই আমি পুলিশের কাছে না গিয়ে আপনার কাছে ছুটে এসেছিলাম। আমি  
জানি আপনি পুলিশের চেয়ে অনেক বেশী কর্মক্ষম। আর আপনি কাজে নামলে  
প্রলয়ের নজরে তা পড়বে না।

দীপক একটু থেমে বলল,—কিন্তু আমার বন্ধুদের নজর অনেক আগেই  
পড়েছে দেখতে পাচ্ছি। ওদের নজর এড়ানো সত্যিই খুব কঠিন।

এমন সময় বানবান শব্দে টেলিফোন বেজে উঠল।

ভেসে এল অপরিচিত এক কণ্ঠস্বর,—হ্যাঁ বন্ধু, ঠিকই বলেছ তুমি। আমার  
নজর এড়ানো সত্যিই খুব কঠিন। তুমি রায়বাহাদুরের কেস গ্রহণ করেছ জেনে  
খুব খুশী হলাম।

কিন্তু একটা কথা মনে রেখো বন্ধু। আমার একজন অহুচরকে ভয় দেখিয়ে  
কী হবে? আমার অহুচর ছড়িয়ে আছে সারা ভারতের প্রতিটি কোণে।  
আমার শক্তির কাছে তুমি যে কত ক্ষুদ্র, কত তুচ্ছ তা আমি প্রমাণ করে দেব।  
তুমি মনে রেখো, তোমার চোখের সামনেই রায়বাহাদুরের ওপর নেমে  
আসবে আমার অমোঘ দণ্ড। এরপর আমার বিজয় রথ এগিয়ে যাবে।  
একের পর এক চলবে আমার বিজয় অভিযান। তুমি কেন, সারা কোলকাতার  
পুলিস বিভাগেরও ক্ষমতা নেই যে আমার কেশাগ্র স্পর্শ করে। বুঝেছ  
মুর্থ?

কথা শেষ হয় না।

দীপক হেসে ওঠে প্রচণ্ড অট্টহাসি,—হা—হা—হা...

তারের ওধার থেকে ভেসে আসে,—হানছ যে?

## প্রলয়ের আলো

দীপক দাঁতে দাঁত চেপে বলে,—এর আগেও আরও অনেক বড় বড় দস্যবদার তাদের ক্ষমতাকে অজেয় মনে করেছিল প্রলয়। কিন্তু তাদের গর্বেকে আমি খর্ব করেছি। মনে রেখো দীপক চ্যাটার্জী পেছোতে জানে না। আজ যে যুদ্ধ ঘোষিত হল তাতে হয় তোমার জয় নয় আমার। দেখা যাক, নিয়তি কার কপালে একে দেয় সে জয়টিকা।

দীপক টেলিকোনের রিসিভার নামিয়ে রাখে।

অপারিসীম উত্তেজনায় তার সারা মুখখানা রক্তবর্ণ ধারণ করেছিল তখন।

## পাঁচ

সেদিন বিকেল।

দীপক বাড়ি থেকে বের হবার উত্তোগ করছে, এমন সময় হঠাৎ একটা গাড়ি এসে দাঁড়াল তার বাড়ির সামনে।

রতন আগেই বেরিয়ে গিয়েছিল। তাই দীপক নীচে নেমে এল আগন্তুককে অভ্যর্থনা করবার জন্তে।

দীপক দেখে গাড়ি থেকে নামেন মিঃ গুপ্ত।

—কী খবর মিষ্টার গুপ্ত।

—খুব জরুরী খবর।

—কী আবার হল হঠাৎ ?

—চিঠি।

—দস্য প্রলয়ের কোন চিঠি পেয়েছেন নাকি আপনি ?

—আমার কাছে হলেও তো ভাল ছিল। একেবারে খোদ পুলিশ কমিশনার সাহেবের কাছে।

## প্রলয়ের আলো

—আশ্চর্য! এ কথা ভাবতেও বিশ্বয় জাগে সামান্য একজন দস্যুর ভয়ে কোলকাতার পুলিশ বিভাগ সন্ত্রস্ত হয়ে উঠেছে।

—কিন্তু এতে দোষ কার বলুন?

—দোষ গুণ কিছুই নেই মিস্টার গুপ্ত। আমাদের এবার দৃঢ়ভাবে এগিয়ে যেতে হবে। যাকগে কই দেখি কী চিঠি দিয়েছে এই প্রলয়।

মিঃ গুপ্ত একখানা ছোট খাম এগিয়ে দেন দীপকের হাতে। দীপক তা থেকে একটা ছোট চিঠি বের করে পড়তে থাকে।

তাতে লেখা :

প্রিয় পুলিশ কমিশনার—

আমার নাম আপনারা হয়ত নিশ্চয়ই শুনেছেন। সারা ভারত জুড়ে আমি বিখ্যাত বা অখ্যাত। আমার নামে ভারতের বহু প্রদেশের পুলিশ বিভাগ আতঙ্কে শিউরে ওঠে।

সম্প্রতি আমি কোলকাতায় পা দিয়েছি। আমি জানি আমাকে জব্দ করবার জন্যে আপনারা অনেক আগে থেকেই বিশেষভাবে তৈরী হয়ে ছিলেন।

কিন্তু আমাকে ধরতে পারবেন কি?

না। কারণ আমার সম্বন্ধে কোন কিছু জানা আপনারদের ওই কর্তব্যবিমূঢ়, ভেড়ার পালকপী পুলিশ বা গোয়েন্দা বিভাগের কাজ নয়।

তবে আপনারা যখন চেষ্টা করছেনই, তখন আমি আপনারদের ক্ষমতাকে চ্যালেঞ্জ করে ক্রমাগত আমার কাজ করে যাব। আমি দেখব কি করে আপনারা আমার কাজে বাধা দেন!

আমি এর আগেই কোলকাতা শহরের নামকরা ধনী রায়বাহাদুর শ্রামণ্য সেনকে চিঠি লিখে তার কাছ থেকে বিশ হাজার টাকা দাবি করেছি।

প্রলয়ের আলো

কিন্তু সে আমার কথা অগ্রাহ্য করে কোলকাতার নামকরা গোয়েন্দা দীপক চ্যাটার্জীর কাছে সাহায্য চেয়েছে। তাই আমি আপনাকে চিঠি লিখছি।

দীপক চ্যাটার্জীর মত গোয়েন্দা আমার কাছে তৃণখণ্ড ছাড়া আর কিছু নয়। তাই আমি আপনাদের সকলকে প্রত্যক্ষভাবে চ্যালেঞ্জ করলাম। যদি আপনাদের ক্ষমতা থাকে আপনারা আমাকে বাধা দিন।

আমি আগামীকাল বেলা ঠিক দশটার সময় সকলের সামনেই রায়বাহাদুরের কাছ থেকে বিশ হাজার টাকা গ্রহণ করব। আপনারা আমার কাজে বাধা দেবার জন্য যত খুশি লোক নিয়োগ করতে পারেন। কিন্তু তাতে আমার কোন অসুবিধা হবে না।

এবার বুঝতে পারছেন তো আমার ক্ষমতা কতদূর প্রসারী। মনে রাখবেন কোলকাতা শহরের প্রতিটি ডিপার্টমেন্টে ছড়িয়ে আছে আমার লোক।

আজকের মত এখানেই শেষ করলাম। কাল দেখা হবে আবার মুখোমুখি। ইতি—

আপনাদের প্রীত্যর্থী

প্রলয়।

চিঠিটা পড়ে দীপক বলে,—প্রলয় যত ক্ষমতাশালীই হোক না কেন, একটা ব্যাপারে সে অগ্নাশ্র দস্যুর মতই।

—কী ব্যাপার, মিস্টার চ্যাটার্জী?

—প্রলয় অগ্নাশ্র দস্যুদের মত নিজের ক্ষমতাকে প্রচার করতে ভালোবাসে।

—তাই তো দেখছি।

—কিন্তু অহংকারই পতনের মূল, জানেন তো?

প্রলয়ের আলো

—একথা বলছেন কেন ?

—বলছি এই জন্তে যে, দেখবেন এই অহংকারের জন্তেই প্রলয়ের পতন  
অনিবার্য ।

—কিন্তু এখন আমাদের কী করা উচিত ?

—আমরা যথারীতি এগিয়ে যাব । চলুন শ্রামলবাবুর বাড়িতে গিয়ে তাঁর  
সঙ্গে একবার দেখা করে যাই ।

—হ্যাঁ, তাই চলুন ।

দুজনে বেরিয়ে গাড়িতে উঠে বসে ।

ছয়

মিনিট কুড়ি পর ।

দীপক আর মিঃ গুপ্তকে নিয়ে মোটরটা এসে থেমে যায় মিঃ শ্রামল সেনের  
বাড়ির সামনে ।

গাড়ি থেকে নেমে শ্রামলবাবুকে খবর দেবার পরই হস্তদস্ত হয়ে বাইরে  
বেরিয়ে আসেন তিনি । আর মিঃ গুপ্তের দিকে নির্দেশ করে বলেন,—ওঁকে তো  
চিনতে পারলাম না মিস্টার চ্যাটার্জী ।

দীপক পরিচয় করিয়ে দেয়,—ইনি হচ্ছেন কোলকাতার পুলিশ বিভাগের  
খ্যাতনামা অফিসার—ইনসপেক্টর গুপ্ত ।

—নমস্কার ।

—নমস্কার । আমাকে বিশেষ কারণেই দীপকবাবুর সাথে আপনার বাড়িতে  
আসতে হয়েছে ।

—আমিও কারণ জানবার জন্তে বড় ব্যস্ত হয়ে পড়েছি ।

—ব্যাপারটা আর কিছুই নয়। এই দস্যু প্রলয়ের ব্যাপারটা আর কি!

হোহো করে হেসে ওঠেন রায়বাহাদুর শামল সেন,—আমি ওকে অতটা ভয় পাই না। প্রায় বারো বছর আগে আমার একবার ওর সাথে সাক্ষাৎ হয়েছিল।

—কিন্তু আপনি কি নিশ্চয় করে বলতে পারেন যে এ সেই দস্যু প্রলয়?

রায়বাহাদুর হেসে বলেন,—আমিও সে বিষয়ে স্থির নিশ্চয় নই মিস্টার গুপ্ত। তা ছাড়া ওই চিঠিটা জাল প্রলয় না আসল প্রলয়ের লেখা সে বিষয়েও স্থির নিশ্চয় নই।

—তাহলে দীপকবাবুর শরণ নিলেন কেন?

—মেটা অনেকটা ঘটনাচক্রের উপর নির্ভর করে বলতে পারেন, বিশেষ করে ওই গুলিটা লাগার পরে।

—আমাদের পুলিশ মহলের ধারণা কিন্তু অন্য। তারা মনে করে এই প্রলয়ই সেই দস্যু প্রলয়।

—তাহলে অবস্থা ভয়ের কথা।

—হ্যাঁ, সেইজন্তে আমরা আপনাকে সাবধান করে দিতে এসেছি। এখানে আসবার আরও একটা কারণ আছে।

—যথা?

—দস্যু প্রলয় পুলিশ কমিশনারকে চ্যালেঞ্জ করে একটা চিঠি দিয়েছে যে আগামীকাল বেলা দশটার সময় সে আপনার কাছ থেকে বিশ হাজার টাকা নেবে।

রায়বাহাদুরের মুখ পাংশুবর্ণ ধারণ করে।

সেদিকে দৃষ্টি রেখে মিঃ গুপ্ত বলেন,—আপনার ভয়ের কোন কারণ নেই। আমরা প্রাণপণে চেষ্টা করবো আপনার টাকা রক্ষা করবার। এ বিষয়ে আমরা আর একটু প্রশ্ন করবার আছে।

প্রলয়ের আলো

—বলুন।

—আপনার কাছে কি এখন বিশ হাজার টাকা আছে ?

—হ্যাঁ, ঠিক ওই পরিমাণ টাকাই আমি কাল ব্যাঙ্ক থেকে বাড়িতে এনে রেখেছি। কিন্তু ওরা তা জানলো কী করে ?

মিঃ গুপ্ত হেসে বলেন,—সেটাই সবচেয়ে বিস্ময়ের কথা। কোলকাতার পুলিশ দল যা জানতে পারে না, এই দস্যু প্রলয়ের দল তা জানতে পারে কী করে ?

বাধা দিয়ে দীপক বলে—কিন্তু এটা আপনি ভুল কথা বললেন, মিষ্টার গুপ্ত।

—কেন বলুন তো ?

—কেন, প্রলয় তার চিঠিতেই তো সব কথা পারস্কার করে জানিয়ে দিয়েছে যে সব ডিপার্টমেন্টে তার লোক আছে। অতএব ওই ব্যাঙ্কেও তার লোক থাকা কিছু অসম্ভব নয়। তাহলেই বুঝতে পারছেন ব্যাপারটা কি। এই ব্রহ্মের মূল সূত্র কোথায় ?

—এবার বুঝলাম, মিষ্টার চ্যাটার্জী।

—যাক এবার রায়বাহাদুরের সাথে কথাবাতা শেষ করে ফেলুন, মিষ্টার গুপ্ত।

মিঃ গুপ্ত এবার রায়বাহাদুর শ্রামল সেনের দিকে চেয়ে বলেন,—তাহলে কাল আপনার সমস্ত বাড়িতে আমরা পুলিশ গার্ড দেবার ব্যবস্থা করে দেব। আর একটা চামড়ার ব্যাগে করে আপনার টাকা আমরা টেবিলের উপর রেখে দিয়ে পাহারা দেব। দেখি কী করে দস্যু প্রলয় সেই টাকা নিতে সক্ষম হয়।

—বেশ তো ! আপনারা কে কে থাকবেন ?

## প্রলয়ের আলো

—আমি আর দীপকবাবু তো থাকবই। তা ছাড়া থাকবে কোলকাতা পুলিশ বিভাগের কয়েকজন নামকরা অফিসিয়াল। আর আর্মড্‌গার্ড যতগুলি সম্ভব রাখা হবে।

রায়বাহাদুর কয়েক মুহূর্ত কী চিন্তা করেন। তারপর বলেন,—তাহলে কী ফল হবে বলে আপনারা আশা করেন, মিষ্টার গুপ্ত।

—তাহলে তো যা অসম্ভব বলে মনে করি, দেখি একজন সামান্য লোক কী করে তা সম্ভব করে। দেখাই যাক না কতদূর এদের ক্ষমতা।

রায়বাহাদুর আর কোন আপত্তি করেন না। তবে তাঁর ভাবভঙ্গী দেখে মনে হয় তিনি যেন ওসব পুলিশের ঝামেলা পছন্দ করেন না।

## সাত

পরদিন।

রায়বাহাদুর শামল সেনের বিডন স্ট্রিটের বাড়িটা পুলিশের বিরাট বেষ্টনীতে আবদ্ধ হয়ে অদ্ভুত আকার ধারণ করেছে।

বাড়ির মধ্যে প্রবেশ করা ও বেরিয়ে আসা সীমাবদ্ধ করা হয়েছে। পুলিশ প্রতিটি লোককে সার্চ করে নানা প্রশ্ন করে সন্দেহমুক্ত হয়ে তবে ভিতরে ঢুকতে দিচ্ছে।

উপরের ঘরে দীপক ও মিষ্টার জোন্স আর মিষ্টার গুপ্ত এবং দুজন সশস্ত্র আর্মডগার্ড টেবিলের উপর রাখা বিশ হাজার টাকার একটা চামড়ার ব্যাগের সামনে বসে আছে।

দীপক রায়বাহাদুরের দিকে চেয়ে বলে, আজ পরীক্ষা হবে দস্যু প্রলয়ের শক্তি বেশী না পুলিশ বাহিনীর শক্তি বেশী।

## প্রলয়ের আলো

রায়বাহাদুর হেসে বলেন,—জানেন তো, একটা কথা আছে, রাজায় রাজায় যুদ্ধ হয়, উলুখড়ের প্রাণ যায়। এও ঠিক তেমনি। যুদ্ধ হচ্ছে, পুলিশের সাথে দস্যু প্রলয়ের, মাঝখান থেকে আমাদের মতো গরিবদের প্রাণ নিয়ে টানাটানি।

মিঃ জোন্স বলেন,—আপনাদের এ বাড়াবাড়ি আমি মোটেই বরদাস্ত করতে পারছি না, মিষ্টার গুপ্ত। সামান্য একটা ডাকাতের জন্তু আপনারা মদলে তার জন্তু পাহারা দিতে এলেন।

মিঃ গুপ্ত হেসে বলেন,—প্রলয়ের অতীত ইতিহাস জানলে তাকে এমনি অবহেলা করতেন না, মিষ্টার জোন্স।

—কিন্তু এ ব্যাপারে নিশ্চয়ই জনসাধারণ এবং বিভিন্ন সাময়িক পত্রিকার সম্পাদকেরা আপনার এ কাজকে সমর্থন করবে না। তারা বলবে সামান্য একটা ডাকাতের ভয়ে সারা লালবাজারের লোক এসে জড়ো হয়েছে।

মিঃ গুপ্ত হেসে বলেন,—প্রলয় সম্পর্কে সব জানলে আপনার মনে সংশয় জাগত যে তার চ্যালেঞ্জ আমরা রাখতে পারব কি না।

মিঃ জোন্স রেগে উঠে বলেন,—এরকম ইনফিরিয়রিটি কমপ্লেক্স নিয়ে কাজ করলে চিরদিনই আপনাকে হার স্বীকার করেই যেতে হবে মিষ্টার গুপ্ত।

—ভাল কথা, আপনি তো আজ রয়েছেন। আর আপনার যথেষ্ট সুপিরিয়রিটি কমপ্লেক্সও আছে। দেখা যাক না কতদূর কী করতে পারেন। অবশ্য ভগবান যদি মুখ রক্ষা করেন তবে আপনার স্বনামও বৃদ্ধি পাবে।

দীপক এদের দুজনের কথা কাটাকাটিতে বেশ আনন্দ উপভোগ করছিল— সে বলে,—কিন্তু নটা তো বেজে গেছে। আশা করা যায় আর একঘণ্টাও ভালো করে কাটবে।

চং চং.....

বেলা ঠিক দশটা বাজল।

মিঃ গুপ্ত বললেন,—কী ব্যাপার? তাহলে সবটাই কি আমাদের বৃথা পরিশ্রম হল?

মিঃ জোন্স তার উত্তরে কী একটা অপ্রাসঙ্গিক রসিকতা করতে যাচ্ছিলেন এমন সময় হঠাৎ শোনা গেল প্রচণ্ড শব্দ।

বুম্ বুম্……

সারা ঘর ধোঁয়ায় আচ্ছন্ন হয়ে গেল দেখতে দেখতে। এক হাত দূরের জিনিসটাও দেখা যায় না।

ধোঁয়া সরে গেলে দেখা গেল টেবিলের উপর চামড়ার ব্যাগটা নেই!

মিঃ গুপ্ত বললেন,—সবই যে-ঘটে গেল নিমিষের মধ্যে।

দীপক বলল,—শ্রোক্ত বসে এরা আমাদের বড্ড ধোঁকা দিয়েছে। কিন্তু আমি ভাবছি শ্রোক্ত বস ওরা পেল কোথায়?

—দম্ভ্য প্রলয় কি আর ওইগুলো তৈরির ফরমূলা জানে না ভেবেছেন?

—হয়তো জানে। কিন্তু সবচেয়ে আশ্চর্যের বিষয় এরা ভিতরে ঢুকল কোন্ পথে। দরজায় তো সশস্ত্র গ্রহরী দাঁড়িয়ে আছে।

মিঃ গুপ্ত মিঃ জোন্সের দিকে তাকিয়ে বলেন,—যান মিস্টার জোন্স এখন এই শেষ কাজটুকু করুন। কী করে প্রলয়ের লোক এখানে ঢুকল তার খোঁজ নিনগে যান।

মিঃ জোন্স নীচে নেমে আসেন। দীপক ও মিঃ গুপ্তও নেমে আসেন তাঁর সাথে সাথে।

মিঃ জোন্স প্রশ্ন করেন জনৈক পুলিশ সার্জেন্টকে লক্ষ্য করে,—ভেতরে এদের লোক ঢুকল কেমন করে?

—এদের লোক? সে কী স্মার? পুলিশ কমিশনার ছাড়া আর তো কেউ ওর ভেতরে যায় নি।

প্রলয়ের আলো

—কমিশনার সাহেব ?

—হ্যাঁ। তিনি ভেতরে গেলেন। তারপর শব্দ হতেই ভেতর থেকে



সারা ঘর ধোঁয়ায় আচ্ছন্ন হয়ে গেল। [ পৃষ্ঠা ৩৩

## প্রলয়ের আলো

ঝেরিয়ে এসে বললেন,—দস্যুরা কোথা থেকে বোমা ছুঁড়ে তাই দেখতে যাচ্ছি। বলে তিনি চলে গেলেন। আর আসেন নি।

দীপক হোহো করে হেসে ওঠে কথাটা শুনে।

—হাসছেন কেন মিষ্টার চ্যাটার্জী?—মিঃ গুপ্ত প্রশ্ন করেন।

—হাসছি এদের ক্ষমতা দেখে। শেষ পর্যন্ত পুলিশ কমিশনারের ছদ্মবেশে ওদের অনুচর ভিতরে ঢুকেছিল।

সকলে হতাশভাবে তাকায় পরস্পরের দিকে। মিঃ গুপ্ত খালি বলেন,—কাল কাগজগুলো লাফালাফি করবে এমন একটা মজার খবর নিয়ে। উঃ কী মারাত্মক ব্যর্থতা আমাদের বরণ করতে হল!

—আর রায়বাহাদুর?—মিঃ জোন্স ফোড়ন কাটেন,—তঁার এত টাকা এভাবে দস্যুর হাতে.....

## আট

এর পর তিন মাস চলে গেছে।

দস্যু প্রলয়ের কীর্তি কাহিনী এরপর খবরের কাগজের পৃষ্ঠাকে অনেকবার অলংকৃত করেছে। পুলিশ তার কোন কিনারা করতে না পেরে ও কেসের ভার ছেড়ে দিয়েছে।

কেবল হাল ছাড়ে নি দীপক চ্যাটার্জী। বছবার আড্ডায় হানা দিয়ে প্রলয়ের কাছাকাছি এসেছে সে। কিন্তু শেষ পর্যন্ত তার সব আয়োজন ব্যর্থ করে প্রলয় পালিয়েছে।

এরপর একদিন হঠাৎ প্রলয়ের অভিযান বন্ধ হয়ে গেল কোলকাতার বৃকে। সে যে কোথায় অদৃশ্য হল তা কেউ জানতে পারল না।

## প্রলয়ের আলো

ইতিমধ্যে আর একদিকে যে অদ্ভুত কতকগুলি ঘটনা ঘটল তা নিয়েই আমাদের গল্প মোড় ফিরছে নূতন আবর্তে—

রায়বাহাদুর অনাদি নোমের বাড়িতে সেদিন মহা ছলস্থল ব্যাপার। রায়বাহাদুরের শোবার ঘরের দরজার উপর বার বার করাঘাত শুরু হয়েছিল। কিন্তু ভেতর থেকে কোন উত্তর নেই।

চিংকার। কোলাহল। অজস্র লোকের ছটলা। পরামর্শ শুরু হল কী করে দরজা ভেঙে ফেলা যায়।

অনেকে চলল পুলিশে খবর দিতে।

এমন সময় ঘরের মধ্যে একটা জিনিস পড়ার শব্দ হল।

—কে? কে? দরজা খুলুন শিগগির.....

বাইরের সকলে চিংকার জুড়ে দিল।

দেশলাল ঘড়িটা বাজল ঢং ঢং করে। রাত এগারোটা বেজে গেল। দরজা ভেঙে ফেলবার জন্য দমাদম আঘাত শুরু হল দরজার উপর।

একজন ছুটে গিয়ে টেলিফোনের রিসিভারটা তুলে নিয়ে বলে,—হ্যালো—পুট মি টু লালবাজার পুলিশ হেড কোয়ার্টারস্...

শহরের এক প্রান্ত থেকে আর এক প্রান্ত পর্যন্ত ছড়িয়ে পড়ে একটা খবর—রায়বাহাদুর অনাদি সোম হঠাৎ তাঁর বন্ধ ঘরের মধ্যে অচৈতন্য অবস্থায় পড়ে আছেন। তাঁর কোন মাড়াশব্দ পাওয়া যাচ্ছে না। দরজা ভেতর থেকে বন্ধ।

ঝম ঝম শব্দে বাইরে বৃষ্টি নামল। অঝোরে ঝরতে থাকে প্রকৃতির ধারা। ঝন ঝন মেঘের গর্জন। সোনালী বিজ্যুতের চকিত ইশারা।

বাড়ির লোকের মুহূর্ত্ত আক্রমণের ফলে মডমড শব্দে দরজা ভেঙে পড়ে।

## প্রলয়ের আলো

সকলে ঘরের মধ্যে হুমড়ি খেয়ে পড়ে একসঙ্গে। সকলের কণ্ঠে একসঙ্গে শব্দনিত হয়,—এ কি! এ যে অসম্ভব ব্যাপার!

ডাক্তারকে জরুরী কল দেওয়া হল।

ডাঃ বাহু রায়বাহাদুরের গায়ে হাত দিয়েই হতাশ মুখভঙ্গী করে বলেন,—  
হোপ্‌লেন্স! হি ইজ স্টোন ডেড্‌। অনেকক্ষণ আগেই এঁর মৃত্যু হয়েছে।

মৃত্যু...

দুটি মাত্র অক্ষর।

অথচ এই দুই অক্ষর সারা বাড়ির বুকে আলোড়ন সৃষ্টি করে।

ডাঃ বাহু স্টেথিস্কোপটি পকেটে রেখে বললেন,—এটা অবশ্যই স্বাভাবিক মৃত্যু নয় বিশ্বস্তরবাবু।

—তার মানে?—রায়বাহাদুরের বড় ছেলে বিশ্বস্তরবাবু প্রশ্ন করেন।

—মানে অতি সাধারণ। রায়বাহাদুরকে হত্যা করা হয়েছে।

—হত্যা, মানে খুন?...

—হ্যাঁ মিস্টার সোম। দিস্‌ ইজ এ কোল্ড ব্লাডেড ডেলিবারেট হোমিসাইড...  
জানি না তাঁর এ মৃত্যুর জন্য দায়ী কে?

—তাহলে উপায়?

—পুলিসে জানান। আমি এ বিষয়ে স্বাভাবিক ডেথ সার্টিফিকেট দিতে পারব না।

ডাঃ বাহু টুপিটা তুলে মাথায় দেন। তারপর বলেন,—তাহলে আমি চলি বিশ্বস্তরবাবু...

—বাবার মৃত্যুর কারণ কী তা তো বললেন না।

—পর্যজনিং। বিধ দিয়ে এঁকে হত্যা করা হয়েছে।

—কোন উপায়ে?

প্রলয়ের আলো।

—এই দেখুন কাথের ডান দিকে একটা চিহ্ন। এটা হচ্ছে জমাটবাঁধা এক-  
ফোটা রক্তের দাগ। কী বিষ প্রবেশ করানো হয়েছে জানি না। পোস্ট মর্টেম  
করলে জানা যাবে।

ডাঃ বাসু বিদায় নেন।

বিশ্বস্তরবাবু বিমূঢ়ের মত চেয়ে থাকেন ডাঃ বাসুর দিকে—তারপর বলেন,—  
আচ্ছা।

পাশের ঘরে গিয়ে তিনি পুলিশে ফোন করেন।

## নয়

তারপর সেই চিরাচরিত প্রথায় তদন্ত শুরু হয়ে গেল। স্থানীয় থানার  
দারোগা মিঃ তালুকদার সংবাদ পেয়ে তাঁর জীপগাড়ি নিয়ে ছুটে এলেন। জোর  
তদন্ত শুরু হয়ে গেল। সারা বাড়িতে হুঁচকি পড়ে গেল।

জবরদস্ত দারোগা বলে মিঃ তালুকদারের একটা স্মনাম ছিল। তিনি তাঁর  
স্মনাম বজায় রাখতে দলে দলে লোককে ধরে এনে জেরা করতে শুরু করে দিলেন।  
রায়বাহাদুরের মৃতদেহটা মর্গে পাঠানো হল।

রায়বাহাদুরের বড়ছেলে বিশ্বস্তরবাবু মিঃ তালুকদারকে কী বলতে এসে ধমক  
খেলেন।

মিঃ তালুকদার বললেন,—যদি স্বাভাবিক মৃত্যু হত তাহলে কিছু বলার  
ছিল না মশাই। কিন্তু এ হচ্ছে অস্বাভাবিক মৃত্যু। মানে সব কিছুর মধ্যেই  
একটা বিশেষত্ব আছে। আমাদের যা করার তা আমাদের করতে দিন।  
আমাদের কাজের ক্ষতি হলে আপনারা তার কৈফিয়ৎ দিতে যাবেন  
না। শুধুন বিশ্বস্তরবাবু, আগে বাড়ির সব লোককে এক এক করে জেরা করা

হবে তার পরে অন্য কথা। আমি চাই আজকের মধ্যে হত্যাকারীকে খুঁজে বের করতে।

—সে তো খুব ভালো কথা। আমিও চাই আমার বাবার হত্যাকারী ধরা পড়ে উপযুক্ত শাস্তি পাক।

—তাহলে বুঝতে পারছেন duty first মশাই... তারপর অন্য কিছু।

বিশ্বস্তর এ কথার অন্য কোন উত্তর দিতে পারেন না।

রায়বাহাদুরের চার ছেলে, তিন মেয়ে।

বড় দুই মেয়ের বিয়ে হয়ে গেছে। তাদের মধ্যে মেজজন শ্বশুরবাড়ি বর্ধমানে থাকে। অল্পজন থাকে বাবার কাছে। তার নাম শ্রামলী। স্বামীর নাম তপনকুমার। ছোট মেয়ে হাপি অতি আধুনিক। কলেজে ফোর্থ ইয়ারে পড়ে। এখনও বিয়ে হয় নি, তবে তার একজন সহপাঠী তার সঙ্গে পরিচয়ের স্বত্র ধরে মাঝে মাঝে এ বাড়িতে যাতায়াত করে। তার নাম বিমল।

চার ছেলের মধ্যে বড় বিশ্বস্তর—বাবার কাজকর্ম দেখাশুনা করেন। রায়-বাহাদুরের দ্বিতীয় অর্থাৎ মেজছেলে যদুনাথ দীর্ঘদিন আগে বাবার ব্যবসা দেখতে বোম্বাইতে থাকতে শুরু করেছিল। সে এখনও সেখানেই থাকে। মেজছেলে রাধানাথ বিলেতে গেছে উচ্চশিক্ষার জন্তে। মাঝে মাঝে তার প্রয়োজন মত টাকা পাঠাতেন রায়বাহাদুর। সম্প্রতি ওদেশ থেকে খবর এসেছিল, রাধানাথ নাকি ওদেশের একটা ফিরঙ্গী মেয়েকে বিয়ে করবে ঠিক করেছিল।

কথাটা জানতে পেয়ে রায়বাহাদুর তাকে কড়া চিঠি লিখে সাবধান করে দেন। এ ধরনের খেয়াল খুশিকে যে তিনি মোটেই প্রশ্রয় দেন না, সে কথাই জানিয়ে দিয়েছিলেন।

প্রলয়ের আলো

রাধানাথ তার উত্তরে লিখেছিল যে তার বাবার ধারণা ভুল। শত্রুই সে দেশে ফিরছে। তার পড়াশুনা শেষ হয়ে গেছে।

চিঠি লেখার পর মাসাধিক হয়ে গেছে কিন্তু রাধানাথ আর দেশে ফেরে নি। এমন কি তার কোন চিঠিও পান নি রায়বাহাদুর। এ ব্যাপারে তিনি একটু বেশ চিন্তিত ছিলেন।

ছোটছেলে অমল ছিল সম্পূর্ণ অন্তঃকরণের। ছোটবেলা থেকেই তার ছিল পলিটিক্সের নেশা। পলিটিক্সের আশুতায় পড়ে অল্প বয়সেই যেসব ছেলেদের লেখাপড়া নষ্ট হয় অমল ছিল তাদের মধ্যে একজন। কিন্তু লেখাপড়া সামান্য হলেও একটি গুণ তার ছিল। সে খুব ভাল বক্তা ছিল। ছুবেলা খাওয়াদাওয়া ছাড়া বাড়ির সাথে তার কোন সম্পর্ক ছিল না।

দক্ষিণ কোলকাতার লেফটিস্ট পার্টির লোকেরা সকলেই অমলের নাম জানতো ভালো করে। বড় বড় লেফটিস্ট মিটিং জমতাই না অমলের বক্তৃতা ছাড়া। দু-একবার খবরের কাগজেও তাব ছবি ছাপা হয়েছে। একবার সে জেলেও গিয়েছিল তিনদিনের জন্য।

তবে রায়বাহাদুরের যেন কী একটা দুর্বলতা ছিল এই ছোটছেলের ওপর। যখনই সে দশ বিশ টাকা দাবি করত তখনই সে আভাব তিনি পূরণ করতেন।

অমল অবশ্য সামান্য কথায় করুণ বা মলজ্জভাবে টাকা চাইত না কোনদিনই। সে টাকা দাবি করত বলা যেতে পারে। সে বলত,—দেশের গরিব দুখীরা যখন খেতে পাচ্ছে না তখন অত টাকা নিয়ে বিলাস করার কোন আধকার তোমার নেই। কাজেই কিছু টাকা পার্টফোও এফুনি দান কর।

এই ব্যাপার নিয়েই দিন দু-তিন আগে অমলের সাথে কিছুটা বচসা

হুয়েছিল রায়বাহাদুরের। পার্টির বিশেষ একটা কাজে সে একশ টাকা চেয়েছিল রায়বাহাদুরের কাছে।

রায়বাহাদুর অমলের প্রস্তাব শুনে বেশ কিছুটা রাগান্বিত হয়ে ওঠেন। এর আগে ছেলের দু-একটা খেয়ালকে হয়ত তিনি প্রশ্রয় দিয়েছেন। কিন্তু দিনে দিনে তার আবদার সীমা ছাড়িয়ে যাচ্ছে। তাকে আর আশ্রয় না দিয়ে শাসন করা উচিত।

রায়বাহাদুরের সাথে অমলের এ নিয়ে বেশ কিছুক্ষণ বচসা হয়। অমল তীক্ষ্ণ-কণ্ঠে বলে,—এরকম করলে ভবিষ্যতে তার অনিষ্ট হবার যথেষ্ট সম্ভাবনা রয়েছে।

রায়বাহাদুর হাসিমুখে ছেলেকে বলেন,—এ বয়সে মাথাটা গরম থাকার জন্তে অনেকেই একথা বলে থাকে। তুমি পার্টির কাজ ছেড়ে দিয়ে বাড়ি বসে থাক।

—আমি আপনার বাড়িতে থাকতে চাই না।

সেইদিনই অমল রায়বাহাদুরকে কোন কথা না বলে বাড়ি ছেড়ে চলে যায়। তারপর অনেকদিন সে এবাড়ির দিকে পা বাড়ায় নি। এমনকি সে কোথায় থাকত সে কথাটাও রায়বাহাদুর জানতে পারেন নি।

তারপর রায়বাহাদুরের মৃত্যুর আগের দিন ভোরে হঠাৎ অমল এবাড়িতে এসে উপস্থিত হল। রায়বাহাদুর তার সঙ্গে কোন কথা বলেন নি—অবশ্য বাড়ি থেকে বেরিয়ে যেতেও বলেন নি।

ছেলেমেয়ে ছাড়া রায়বাহাদুরের বাড়িতে থাকত তাঁর এক দূরসম্পর্কের ভাইপো বিলাস আর তার স্ত্রী কণিকা। কণিকার একটিমাত্র ছেলে—নাম অজিত। বয়স তার ষোলোর কাছাকাছি। রায়বাহাদুরের মেয়ে শামলীরও একটি ছেলে আছে। তার নাম সরিৎ।

এছাড়া এবাড়িতে থাকে দুটি চাকর, দারোয়ান, ঝি অন্নদা, আর পাচকঠাকুর রঘুনাথ।

## দশ

পরদিন বেলা আটটা।

টেলিফোনের ঘন ঘন আর্তনাদ প্রখ্যাত ডিটেক্টিভ দীপক চ্যাটার্জীকে চঞ্চল করে তুলল। এত সকালে কে আবার তাকে বিরক্ত করছে।

বিশিভারটা তুলে নিয়ে দীপক গম্ভীর কণ্ঠে প্রশ্ন করে,—হালো, চ্যাটার্জী স্পিকিং, আপনি কোথেকে কথা বলছেন?

—আমি মিস্টার গুপ্ত কথা বলছি।

—গুড্ মরনিং মিস্টার গুপ্ত। তারপর খবর কী?

—খবর খুব সিরিয়ান। রায়বাহাদুর অনাদি নোমকে কে বা কারা তাঁর ঘরের ভিতর হত্যা করেছে। পুলিশ মর্গে তাঁর মৃতদেহ নিয়ে যাওয়া হয়েছিল। পোস্ট মর্টেম রিপোর্টে জানা গেল যে, মৃত্যু হয়েছে বিষেব ক্রিয়ায়।

—এ মৃত্যুর কারণ সম্বন্ধে কোন তথ্য কি আবিষ্কার করা সম্ভব হয়েছে?

—তা এখনও জানা যায় নি। এমনকি কীভাবে যে হত্যাকারী তাঁকে হত্যা করল তাও বোঝা যাচ্ছে না।

—তাব মানে?

—মানে মৃত্যুর পর জানালা দরজা সব বন্ধ ছিল। জানালা দুটোতে মোটা গরাদে দেওয়া। দরজা দুটোই ভেতর থেকে বন্ধ। তবুও কী করে যে তাঁকে হত্যা করল এবং হত্যাকারী গা-ঢাকা দিল তা আদৌ বোঝা যাচ্ছে না।

—তাহলে ক্রমশঃ কেসটার ভিতর অনেক জটিলতা দেখে আপনারা ঘাবড়ে গিয়েছেন আর শেষ পর্যন্ত আমার শরণাপন্ন হয়েছেন।

—কথাটা ঠিক। আমি আশা করি আমাদের যা কিছু ভুল হয়েছে এই তদন্তে বিষয়ে, আপনি তা নিশ্চয়ই মল্ভ করতে পারবেন।

—কিন্তু মিষ্টার গুপ্ত, এ কথাটা বোধহয় আপনার জানা আছে যে সমস্ত কাজের ভার আমার উপর গ্রস্ত করলে আমি তা গ্রহণ করি। তবে আমার প্রয়োজনে আমি আপনাদের সাহায্য নেব।

—সে কথা আমি ভালো করেই জানি মিষ্টার চ্যাটার্জী। আপনি এক্ষুনি লালবাজার পুলিশ হেডকোয়ার্টার্সে চলে আসুন। আমি আপনার সব বন্দোবস্ত করে দিচ্ছি। আর একটা কথা—

—কী কথা—বলুন।

—পুলিস তরফ থেকে আমরা একটা রিওয়ার্ড ঘোষণা করেছি। রায়-বাহাদুরের হত্যাকারীকে যে গ্রেফতার করিয়ে দেবে সে পাঁচ হাজার টাকা পুরস্কার পাবে। আর আপনি এ কেসের তদন্তভার নিচ্ছেন বলে আপনার খরচ-বাবদ এক হাজার টাকা অগ্রিম দেবার ব্যবস্থা করেছি।

—ওসব আবার কেন করতে গেলেন, মিষ্টার গুপ্ত?

—এটা আমাদের ডিউটি।

—আচ্ছা, তাহলে আমি এক্ষুনি আসছি।

আধ ঘণ্টা পর।

দীপকের গাড়ি এসে থামে লালবাজার পুলিশ হেডকোয়ার্টার্সের সামনে।

গাড়ি থেকে নেমে ভেতরে গিয়ে মিঃ গুপ্তের সাথে দেখা করে দীপক। ও. সি. মিঃ তালুকদারও মিঃ গুপ্তের আহ্বানে লালবাজারে পুলিশ হেডকোয়ার্টার্সে এসে অপেক্ষা করছিলেন।

মিঃ গুপ্ত দীপকের সাথে মিঃ তালুকদারের পরিচয় করিয়ে দেন।

দীপক বলে,—কেসটার বিষয়ে মোটামুটি অনেকটা আমি মিষ্টার গুপ্তের কাছে জানতে পেরেছি। এবার তদন্তের ব্যাপারে আপনি কতটা এগিয়েছেন তা জানতে চাই।

প্রলয়ের আলো

—মোটামুটি সাধারণ তদন্ত দ্বারা আমি এগিয়েছিলাম, মিস্টার চ্যাটার্জী।  
বাড়ির প্রত্যেকটি লোককে আমি খুঁটিয়ে খুঁটিয়ে জিজ্ঞেস করেছিলাম, কিন্তু  
তবুও আসল খুনীর কোন হাদিস পাই নি।

—আচ্ছা, দরজা বন্ধ থাকার অবস্থায়ও কী করে একজন লোকের মৃত্যু হল  
এরই রহস্যের সমাধান করতে পেরেছেন কি?

—আজ্ঞে না।

—প্রথমে কার ওপর আপনার সন্দেহ কেন্দ্রীভূত হল মিস্টার তালুকদার?

—রায়বাহাদুরের ছোটছেলে অমলই বোধ হয় হত্যাকারী।

—এ ধারণার কারণ?

—সাবাকে হতিপূর্বে সে ভয় দেখিয়েছিল এবং ঠিক হত্যার আগের দিন সে  
বাড়ী ফিরে আসে।

—তা থেকেই কি প্রমাণ করতে পারেন যে সে হত্যাকারী?

—ঠিক তা নয়, মিস্টার চ্যাটার্জী। কিন্তু সন্দেহটা অনিবার্য কারণে ওর  
উপর এসে পড়ে না কী?

—কতকটা অবশ্য তাই। তা ছাড়া এসব ব্যাপারে সন্দেহের হাত থেকে  
কেউ বেহাই পায় না।

—আমি অবশ্য আর কাউকেই সন্দেহ করতে পারি নি।

—যাক সে কথা, রায় বাহাদুরের মৃত্যু সম্পর্কে পোস্টমর্টেম রিপোর্ট কি বলে?

—এই দেখুন পোস্টমর্টেম রিপোর্ট। মিঃ তালুকদার তাঁর জরুরী ফাইল  
থেকে রিপোর্টটা বের করে দিলেন।

দীপক পোস্টমর্টেম রিপোর্টটা বেশ ভালো করে দেখে—ইন্সপেক্টর নিয়াম  
ডেথ ডিউ টু দি ইন্জেকশান অফ স্ট্রং মেটালিক পয়জন্।

দীপক রিপোর্টটা মিঃ তালুকদারের হাতে ফেরত দিতে দিতে বলে,—  
রায়বাহাদুর কি মৃত্যুর আগে কোন উইল করেছেন?

—হ্যাঁ। তাঁর বিষয় সম্পত্তি তিনি তাঁর আত্মীয়দের মধ্যে ভাগ করে দিয়েছেন। আজ বেলা দশটার সময় তাঁর অ্যাটর্নি মিস্টার চ্যাটার্জী উইলটা রায়বাহাদুরের আত্মীয়দের পড়ে শোনাবেন।

—তাঁরা এর আগে উইলের বিষয় কিছু জানতেন না?

—না, তাঁরা বলেছেন, তাঁরা এ বিষয়ে অজ্ঞ। তবে আসলটা যে কী তা আমি জানি না।

—তাহলে এক কাজ করতে হবে মিস্টার তালুকদার। আজ বেলা দশটার সময় আমাদের একবার রায়বাহাদুরের বাড়িতে যেতে হবে। উইলের বিষয় আমাদেরও জানা দরকার। আর তদন্তের ব্যাপারে ওই উইল আমাদের খুব সাহায্য করবে।

—বেশ আমি সেই ব্যবস্থাই করছি।

—ধন্যবাদ।

মিঃ গুপ্ত ও মিঃ তালুকদারের সাথে কর্মদর্শন করে দীপক উঠে দাঁড়ায়।

## এগারো

রায়বাহাদুরের পরিবারের সকলে এবং তাঁদের পরিবারের সঙ্গে সংশ্লিষ্ট প্রায় সকলেই হলঘরে জমায়েত হয়েছিল।

মেজছেলে ও মেজমেয়েই গুপ্ত এঁদের সেই সভায় যোগ দিতে পারে নি। তাদেরও টেলিগ্রাম করা হয়েছে। দু-একদিনের মধ্যে তারা এসে পড়বে। মেজছেলে বিলাতে বাস করে বলে অনাবশ্যক ভেবে তাকে কোন খবর দেওয়া হয় নি।

অ্যাটর্নি মিঃ চ্যাটার্জী ঘটাসময়েই এ বাড়িতে এসে উপস্থিত হয়েছেন।

প্রলয়ের আলো

মিঃ চ্যাটার্জী আসার সাথে সাথেই এ বাড়িতে একটা সাড়া পড়ে যায়। সকলেই একটু সমস্ত ও চকিত হয়ে ওঠে।

দীপক জানে যে, এসব ক্ষেত্রে অগ্রমনস্ক হয়ে পড়লে যে কোন অভাবনীয় ঘটনা ঘটতে পারে। সে যথেষ্ট সতর্ক হয়ে প্রত্যেকটি লোকের গতিবিধি ও কার্যকলাপের ওপর নজর রাখছিল।

বিশ্বম্ভরবাবু সমস্ত আত্মীয়ের সাথে অ্যাটর্নি মিঃ চ্যাটার্জীর পরিচয় করিয়ে দেন। সবার শেষে মিঃ তালুকদার ও দীপকের সাথে তিনি পরিচিত হন।

তাদের দুজনকে দেখে তিনি বেশ সহজেই অনুমান করতে পারেন যে কেসটা বেশ জটিল। জটিলতাপূর্ণ মারাত্মক কেস না হলে পুলিশ বিভাগের সঙ্গে খ্যাতিনামা দীপক চ্যাটার্জী এখানে উপস্থিত থাকতেন না।

—আপনার সাথে আমার একটা কথা ছিল মিস্টার চ্যাটার্জী।—দীপক বলে।

—বলুন।

—যে সময়ে আপনি উইল পড়বেন, সে সময় বেশ একটু সাবধানে থাকতে হবে আমাদের।

—তা ত নিশ্চয়ই।

—আচ্ছা উইলের শর্তগুলি কী জানা আছে আপনার?

—না।

—কেন?

—উনি মৃত্যুর আগে একটা বড় লেফাপার ভিতর উইলটা পুরে সীলমোহর করে রেখেছিলেন। ওর মৃত্যুর আগে যাতে কেউ নেটা দেখতে না পায় আমাদের উপর এই নির্দেশ দেওয়া হয়েছিল।

—বুঝেছি। এতে আমাদের কাজের সুবিধাই হল।

—কেন ?

—হঠাৎ উইলের শর্ত শুনে কার মনের উপর সেটা কিরূপ কার্যকরী হল সেটা বোঝা যাবে। যাকগে এবার আপনি উইলটা পড়তে শুরু করুন।

উইলটা খুলে মিঃ চ্যাটার্জী পড়তে শুরু করলেন :

আজ কয়েকদিন ধরে কে বা কারা আমাকে গোপনে হত্যা করবার চেষ্টা করছে। তাই মৃত্যুর আগে আমি ঘোষণা করছি, সেই অদৃশ্য আততায়ীকে যে গ্রেপ্তার করতে পারবে তাকে বিশ হাজার টাকা আমার ব্যাংক অ্যাকাউন্ট থেকে পুরস্কার দেওয়া হবে।

এ ছাড়া আমার স্বাবর-অস্বাবর সম্পত্তি যার দাম কম করে বিশ লক্ষ টাকার অনেক বেশী তা পাবে আমার দুই মেয়ে শ্রামলী ও হ্যাপি, ছেলে বিশ্বস্তর ও ভাগনে তপন। এই চার ভাগে ভাগ করা হবে। আর মৃত্যুর আগে আমি যে ত্রিশ হাজার টাকা দামের রক্তহীরা তৈরি করেছি, যা শোবার বরে সিন্দুকে রয়েছে—

গুড্‌ম ! গুড্‌ম !

রিভলভারের শব্দ আর ধোঁয়া।

ঝনঝন করে সার্ভিস কঁচ ভেঙে গেল।

রিভলভারের শব্দে মিঃ চ্যাটার্জী উইল পড়া বন্ধ করে দিয়েছিলেন,—কী ব্যাপার মিস্টার চ্যাটার্জী ?

—ব্যাপার অতি সাধারণ—দীপক হাসতে হাসতে বলে,—একটি ছায়া জানালার ওপার থেকে এ ঘরের প্রতিটি কথা শুনছিল। প্রতিটি কার্যকলাপের উপর নজর রাখছিল। আমি গুলি করবার পূর্বেই সে মাথাটা নীচু করে নিয়ে এ যাত্রা আমার উদ্দেশ্যকে ব্যর্থ করে দিয়েছে।

—কিন্তু ছায়ার পেছনে আসল কায়াটি কার ?

প্রলয়ের আলো।

—আই অ্যাম ইন দি ডার্ক, মিস্টার চ্যাটার্জী। তবে মনে হয় এ বাড়িরই কোন লোক।

—কিন্তু বাড়ির সব লোক তো এখানেই। আর যারা আসে নি তারা তো থাকে অনেক দূরে।

—কিন্তু আমি define, মিস্টার চ্যাটার্জী, সে নিশ্চয় এ বাড়িটির প্রতিটি অংশের খবর রাখে।

—বাট হাউ?

—সেটা আমি জানি না। যাকগে তার আগে একটা বড় কাজ আছে। উইলের শেষ অংশে যে রক্তহীরার কথা আছে সেটার বিষয়ে কি করা যেতে পারে বলুন।

—কিন্তু সেটা কোথায়? এ বাড়ির সব তন্ন তন্ন করে খুঁজেও তার কোন সন্ধান পাই নি।—বললেন বিশ্বস্তরবাবু।

—সিন্দুক থেকে হীরা উদ্ধাও হয় নি নিশ্চয়ই।

—না, সিন্দুকে যে এটা থাকতে পারে তা আন্দাজ করেছিলাম। কিন্তু সিন্দুক এখনও খোলা হয় নি।

—তবে চলুন, আগে সেটা দেখে আসি।

—সকলে মিলে রায়বাহাদুরের ঘরে গিয়ে সিন্দুক খুলে হতবাক হয়ে যায়। সিন্দুকে কোন হীরা পাওয়া যায় না।

এবার দীপক বলে,—হীরেটা যে সরিয়েছে সেই যে খুনী একথা আমি বলছি না তবে আমি আপনাদের বেশ কিছুটা সময় দিচ্ছি, আপনারা ইচ্ছে করলে হীরেটা আবার স্বস্থানে রেখে আসতে পারেন। আমি তাকে একটা স্বেযোগ দিতে চাই। তাই আজ আপনারা কেউ এ ঘরে যাবেন না দয়া করে।

আর একটা কথা। রায়বাহাদুরের মৃত্যুর পর আপনারা যারা এ বাড়িতে ছিলেন তারা কেউই তদন্ত শেষ হবার আগে বাড়ি ছেড়ে চলে যাবেন না। যদি

কেউ চলে যান তবে তিনি যে খুনের সঙ্গে জড়িত এটাই প্রমাণিত হবে। আশা করি বিনা কারণে কেউ মিথ্যা মর্মেতাকে নিজের সঙ্গে জড়িত করতে চাইবেন না। তাহলে এবেলার মত আমি আপনাদের কাছ থেকে বিদায় নিচ্ছি।

দীপক উঠে দাঁড়ায়। সকলে পরস্পর মুখ চাওয়াচাওয়ি করতে থাকে।

বাড়ি থেকে বেরিয়ে দীপক দ্রুত বেরিয়ে যায় বাইরে দাঁড়িয়ে থাকা জীপ গাড়িটার দিকে।

দীপকের নজর হঠাৎ আটকে যায় গাড়ির দিকে। সেখানে একটা সাদা কাগজ পিন দিয়ে আঁটা।

কাগজে স্পষ্ট হরফে লেখা :

প্রিয় ডিটেকটিভ দীপক চ্যাটার্জী,

সত্যি আপনার অসাধারণ বুদ্ধি ও চিন্তাশক্তির তারিফ করি। আপনি হীরা চোরকে ধরবার জন্য অনেকটা এগিয়েছেন। কিন্তু একটা কথা আপনাকে বলে শেষবারের মত সার্বধান করে দিচ্ছি। এই নিয়ে আর যদি এগোবার চেষ্টা করেন তবে আপনি ভীষণ বিপদে পড়বেন।

মনে রাখবেন এটা হচ্ছে আমার আলটিমেটাম।

আশা করি কোন পথে চলতে হবে সেটা স্থির করার মত বুদ্ধি আপনার আছে। ইতি—

আপনার পুরোনো বন্ধু।

চিঠিখানা আগাগোড়া পড়ে দীপক বলে,—যত সব রাবিশ!

—আপনি ঠিকই বলেছেন মিস্টার চ্যাটার্জী।—মি: তালুকদার বলেন।

দীপক মুহূর্তে হেসে বলে,—এ ক্রিমিনাল খুবই চতুর লোক মর্মেতাহ নেই—কিন্তু সে ভুলে গেছে যে আমিও রহস্যভেদী দীপক চ্যাটার্জী।

## বারে।

বেলা পাঁচটার সময় দীপকের শেল্ডেলে মোটর এসে দাঁড়াল রায়বাহাদুরের বাড়ির সামনে। পরপর দুবার হর্ন বাজাবার পর একজন চাকর এসে সেলাম জানাল।

—বিশ্বস্তরবাবু কোথায়?

—তিনি একটু বাইরে গেছেন।

—আর সবাই?

—চায়েষ ঢেবিবে।

কথা শেষ হতে না হতেই রায়বাহাদুরের ছোটছেলে অমলকে দেখা গেল সেখানে।

—একি, দীপকবাবু যে, তারপর আপনার কাজ কতখানি এগোলো?

—অনেকখানি।

—ভই নাকি? হীরা চোরকে ধরতে পেরেছেন?

—পারি নি, তবে মোটামুটি আন্দাজ করেছি।

—আপনার সঙ্গে আমার কয়েকটা কথা ছিল দীপকবাবু।

—জানি।

—চলুন তবে একটা নিরিবিলা জায়গায় বসে আমাদের কথাবার্তা শেষ করি।

বাগানের ঘাসের উপর বসে দুজনে কথা শুরু করে।

—এবার তাহলে শুরু করুন অমলবাবু।

—হ্যাঁ, প্রথম থেকেই আরম্ভ করছি আমি। দীপকবাবু, আমি আপনার কাছে স্বীকার করছি আমিই সেই লোক—যে হীরাটা চুরি করেছিল।

—আপনি ?

—হ্যাঁ।

—আর আপনার বাবার হত্যাকারী ?

—জানি না আমি। সব জানালা দরজা বন্ধ অবস্থায় আমি ঘরের মধ্যে প্রবেশ করেছিলাম, বাইরে থেকে দরজার চাবি খুলবার যন্ত্রের সাহায্যে দরজা খুলে।

—কিন্তু কেন দরজা খুলেছিলেন ?

—হীরেটা চুরি করবার জগেই।

—বেশ, তারপর ?

—আমি চাবির ফাঁক অর্থাৎ keyhole দিয়ে দেখতে পাই যে, বাবা মেঝের উপর পড়ে আছেন। কিন্তু এটা যে একটা দুর্ঘটনা তা বুঝতে আমার দেবী হয় না। আমার তখন ভীষণ অবস্থা। যেমন করেই হোক টাকার যোগাড় আমাকে করতেই হবে। তবে আমি ঠিক এই সুযোগটাকে কাজে লাগালাম।

—কিন্তু আপনার এত বেশী টাকার প্রয়োজন হল কেন ?

—তাহলে অনেক কথাই বলতে হয় দীপকবাবু—আমি একটা পলিটিক্যাল পার্টিতে থাকতাম। বাবা এ বিষয়ে আমাকে খুব উৎসাহ দিতেন। কিন্তু টাকার ব্যাপারে তিনি তেমন মুক্তহস্ত ছিলেন না। আমাদের একটা নতুন পলিটিক্যাল মুভ নেবার ব্যাপারে আমি দুশো টাকা সাহায্য করবার প্রতিশ্রুত হই।

কিন্তু বাবা আমাকে একশো টাকাও দিতে রাজি হলেন না। তখন আমি রাগ করে রাড়ি থেকে চলে গিয়ে কয়েকদিন এক বন্ধুর বাড়িতে আশ্রয় নিলাম। অবলাম বাবা আমার অভিমান ভেঙে দিয়ে আমাকে সাহায্য করবেন

প্রলয়ের আলো

কিন্তু তা যখন হল না তখন আমি নতুন কোন আশ্রয় না পেয়ে কিরে এলাক  
বাড়িতে ।

—আপনার সে অদ্ভুত যন্ত্রটি কোথায় পেলেন ?

—সেটি বাবার গোপন সেক্রেট ছিল । বাবার অস্থিস্থিতিতে তাঁর সিঁদুক  
থেকে ঢাকা সরাবার মানসে আমি সেটা সন্নিবেশিত ফেলি ।

—তাহলে আপনি ভেতরে ঢুকে সিঁদুক থেকে হীরেটা নিয়ে দরজা বন্ধ করে  
দিয়ে রেখে আসেন ?

—আপনি ঠিকই ধরেছেন ।

—আপনার বাবার মৃত্যুর বিষয়ে জানাজানি হল তার কতক্ষণ পরে ?

—আমি ছুটে গিয়ে বরদাকে বললাম যে, বাবার ঘর থেকে একটা শব্দ শুনতে  
পেয়েছি । ভয় পেয়ে বাবার নাম ধরে ডেকেও কোন সাড়াশব্দ পাই নি ।  
তারপর সকলে ছুটে এসে দরজা ভেঙে ঘরে ঢুকল ।

—কিন্তু পিছনের দরজার কথা কেউ ভেবে দেখেন নি কেন ?

—কারণ সেটাও বন্ধ ছিল বলে কেউ ধারণা করতে পারে নি যে, এটা খুনের  
কেন্দ্র হতে পারে ।

—কিন্তু একটা কথা অমঙ্গবাবু । আপনার আগে একজন লোক রাগবাহাদুরকে  
খুন করে পালাল কোন্ পথে ?

—তা অবশ্য আমি বুঝতে পারছি না ।

—আর একটি কথা—হীরেটা এখন কোথায় ?

—আমি সেটা আমার ঘরের দেয়ালে এনে লুকিয়ে রাখি । আজ সকাল  
থেকে সেটা খুঁজে পাচ্ছি না ।

—খুঁজে পাচ্ছেন না ?

—না । তন্ন তন্ন করে সব খুঁজলাম । কিন্তু সেটা যেন কপূর হয়ে হাওয়ায়  
মিলিয়ে গেছে ।

## প্রশ্নের আলো

—কিন্তু আপনার এ কথা তো কেউ বিশ্বাস করবে না।

—তা আমি জানি। কিন্তু বিশ্বাস করুন যা সত্য তাই আপনাকে সব খুলে বললাম।

—নাথিং মোর ?

—না, আর কিছু আমার বলবার নেই।

দীপক উঠে দাঁড়াতে দাঁড়াতে বলে,—দেখা যাক, এর পর কত দূর কী করতে পারি। হীরে চোর আর খুনী যে একই লোক, তা আমি আগে আন্দাজ করেছিলাম। কিন্তু প্রথমবারের হীরে চোর যে আপনি তা বুঝতে পারি নি।

—আর দ্বিতীয় হীরে চোর ?

—তাকে খুঁজে বের করতেও আমার খুব বেশী দেরি হবে না, অমলবাবু। হি উইল বিকট রেড-হ্যাণ্ডেড্। আচ্ছা একটা কথা আপনাকে জিজ্ঞেস করছি অমলবাবু। আশা করি সত্য উত্তর দেবেন।

—বলুন।

—খুনী বলে এ বাড়ির কাউকে আপনার সন্দেহ হয়।

—সঠিক করে বলতে পারি না। তবে আমার মনে হয় এ বাড়িরই কেউ এই খুনের সঙ্গে জড়িত।

—আপনাকে আর একটা প্রতিশ্রুতি দিতে হবে ?

—বলুন।

—হত্যাকারী ধরা না পড়া পঞ্চম আপনার সাহায্য দরকার হলে আপনি আমাকে সে সাহায্য করবেন।

—করব।

দীপক আর কথা বলে না, নীরবে কী যেন চিন্তা করে।

## তেরো

চায়ের টেবিলে সকলকেই পাওয়া গেল—এক বিশ্বস্তবাবু ছাড়া। শোন গেল, তিনি গেছেন অ্যাটর্নী মিঃ চ্যাটার্জীর সাথে কোন জরুরী বিষয় আলোচনা করতে।

সকলেই দীপককে অভ্যর্থনা জানায়।

হ্যাপি বলে,—দীপকবাবু, এদিকের খবর শুনেছেন তো?

—খবর?

—হ্যাঁ, বড়বউদির ঘরে একটা কাঁচের সিরিঞ্জ পাওয়া গেছে।

—কোথায় সেটা? এখন সেটা নিয়ে আছেন। ওটি ভালো করে কেমিক্যাল অ্যানালিসিস করে দেখতে হবে। আমার মনে হয় ওতে বিষ পাওয়া যাবে।

মিঃ তালুকদার বলেন,—ওটা বিশ্বস্তবাবুর ঘরে গেল কেমন করে?

দীপক মুহূর্তেই বলে,—খুনী মাকে মাঝে বড্ড কাঁচা কাজ করে ফেলেছে।

—কেন বলুন তো?

—খুনী ভেবেছে ওটা বিশ্বস্তবাবুর ঘরে রেখে তার ওপর আমাদের নজর আকর্ষণ করবে।

—কেন, তা কি সম্ভব নয়?

—আদৌ নয়।

—কেন?

—বিশ্বস্তবাবু সত্যি খুনী হলে বোকার মত সিরিঞ্জটা নিজের ঘরের মেঝেয় ফেলে রাখতেন না।

—তাও তো বটে।

—আসলে এটা হচ্ছে খুনীর বড় রকমের একটা ঝাঞ্জা।

এমন সময় ছাপি জিরিঞ্জটা নিয়ে ফিরে আসে। দীপকের হাতে সেটা তুলে দিয়ে বলে,—আপনার সাথে আমার একটা গোপন কথা আছে দীপকবাবু।



## প্রায়ের আলো

—বেশ চলুন ওপাশের ফাকাটায় যাই। মিস্টার তালুকদার আমি একুনি কিরছি।

বাগানে হুজনে পাশাপাশি বসে।

হাপি প্রথমে কথা শুরু করে,—আমার কিন্তু একটা সন্দেহ হচ্ছে দীপকবাবু।  
আমার মনে হয় ছোড়দাই বাবাকে খুন করেছে।

—আপনার এ সন্দেহের কারণ?

—যেদিন বাবা মারা যান সেদিন ছোড়দাকে আমি বাবার ঘরে সন্দেহ-জনকভাবে ঘোরাকেরা করতে দেখেছিলাম। তাকে সেদিন কেমন উত্তেজিত বলে মনে হয়েছিল।

—আচ্ছা, উইল অনুযায়ী উনি যে সম্পত্তি পাচ্ছেন, তা কি উনি জানতেন?

—তা ঠিক করে বলতে পারি না। তবে জানাও কিছু অসম্ভব নয়। আর তখন ছোড়দা ঢাকার জন্তে ঘেরকম ডেসপারেট হয়ে পড়েছিল তখন তার হীরে চুরি করাও কিছু অসম্ভব নয়।

—কিন্তু তা থেকেই মনে হয় না উনি রায়বাহাদুরকে হত্যা করেছেন। আর তা ছাড়া হীরেসের আর খুনী যে এক ব্যক্তি নয় তা আমরা জানতে পেরেছি। আপনার আর কিছু বলবার আছে?

—না।

হাপির কথাগুলো হেনে উড়িয়ে দিলেও মনের মধ্যে একটা কথা খচখচ করতে লাগল।

ঘটনাচক্রে যা দাঁড়াচ্ছে তা আসল অপরাধী এই বাড়ির মধ্যেই কেউ। কিন্তু সে কে?

সবকিছু ঘটনার জট দীপকের মাথার মধ্যে কেমন গোলমাল করে দেয়।

প্রলয়ের আলো

ছাপিকে চায়ের টেবিলে পাঠিয়ে দীপক আপন মনেই বাগানে ঘুরে  
বেরড়াচ্ছিল। একটা গাছের পাশ দিয়ে যেতেই হঠাৎ শিকড়ে পা বেধে সে মুখ  
খুবড়ে পড়ে গেল।



...এক ঝলক আগুনের স্রোত বয়ে গেল। [পৃষ্ঠা ৫৮]

## প্রলয়ের আলো

এভাবে পড়বার জন্ত সে প্রস্তুত ছিল না।

কিন্তু সঙ্গে সঙ্গে তার মাথার উপর দিয়ে যেন এক বলক আগুনের স্রোত বয়ে গেল।

একটা অজানা হাতের পিস্তলের গর্জন শোনা গেল—গুড্‌ম!

দীপক নিজের ভাগ্যকে ধন্যবাদ দিল। আচমকা পা পিছলে পড়ে না গেলে সে এ যাত্রা রক্ষা পেত কিনা সন্দেহ।

দীপক পকেট থেকে নিজের পিস্তলটা বের করে সামনের ঝোপটার দিকে তুলে ধরে ফায়ার করল।

প্রচণ্ড শব্দ!

দীপক সামনের ঝোপের ভিতর ঢুকে নাক বরাবর ছুটে লাগল।

ঝোপ-ঝাড়, বন-বাদাড় পেরিয়ে সে ছুটল। বহুদূরে দেখা গেল একটা দেহ—একটি পথের বাঁকে মিলিয়ে গেল।

বাড়ির সকলেই সেখানে এসেছিল।

মিঃ তালুকদার চিৎকার করে উঠলেন,—কী ব্যাপার, মিস্টার চ্যাটার্জী?

—ব্যাপার সামান্যই।—দীপক হাসতে হাসতে বলে,—আর একটু হলেই পৃথিবীর মায়া কাটাচ্ছিলাম আর কি! নেহাত গাছের শিকড়ে বেধে পড়ে গিয়েই...

—কিন্তু কে সে?

—হাতেনাতে না ধরলে বলা যাচ্ছে না। তবে অসুস্থ্যমান একটা করেছি এবং কথা দিচ্ছি বেঁচে থাকলে অর্থাৎ শত্রুর গুলিতে প্রাণ না দিলে আজই এ রহস্যের কিনারা করব।

—ধন্যবাদ!

সকলে বাড়ির দিকে পা বাড়ায়।

দীপক অমলের দিকে চেয়ে বলে,—আজ রাতে আমি আপনাদের বাড়িতেই থাকব এতে আপনাদের কারও কোন আপত্তি নেই তো—

—না না, এখনি আমরা আপনার থাকবার ব্যবস্থা করে দিচ্ছি।

## চৌদ্দ

সেদিন সকাল থেকেই আকাশ ছিল ঘনঘটাচ্ছন্ন। মাকে মাঝে ঝিরঝির করে বৃষ্টি ঝরছিল অঝোরে।

চিন্তাবৃত্ত দীপক চুপচাপ ঘুরে বেড়াচ্ছিল বাড়ির চারপাশে। সে বিনা কারনে ঘুরছিল না। সে হত্যাকারীর পায়ের ছাপ পাবার আশা করছিল।

কিন্তু তার চেষ্টা সফল হয় না। তিজ্জে ঘাসের উপর পায়ের ছাপ তেমন ভালো ভাবে ওঠে না।

দীপক আপন মনেই চিন্তায় তলিয়ে গিয়েছিল, এমন সময় যেন কোথেকে ফিসফিস শব্দ শুনেতে পায়। দুজন লোক বোধহয় কোপের ভিতর দাঁড়িয়ে তাদের নিজেদের মধ্যে কী বিষয়ে আলোচনা করছিল।

কে এরা দুজন? কী বিষয়ে আলোচনা করছে? দীপক উৎকর্ণ হয়ে থাকে।

একজন বলে,—আগে থেকে আমাদের একটু সতর্ক হওয়া উচিত ছিল।

তা যখন হয় নি তখন মিথ্যে চিন্তে করে লাভ কী?

অন্যজন বলে,—হীরেটা নেবার ইচ্ছে আমার আদৌ ছিল না।

—এটার দাম কত জান?

—দাম যতই থাক—কিন্তু বিক্রি করা তো এখন মহা মুশকিল।

—তা তো বটেই কিন্তু এটা এখন রাখি কোথা?

—ও আলোচনা পরে করা যাবে। এখন এদিকের কী করা যাবে? দীপক চ্যাটার্জীকে হোঁ শেব করতে পারলো না। এত তাড়াতাড়ি একটা অ্যাটর্নেট নেওয়াই আমাদের ভুল হয়েছে।

—কিন্তু আমি ভাবছি অন্য কথা। ও আমাদের বিষয়ে কতটা জানতে পেরেছে?

প্রলয়ের আলো

—যতটাই পাক্ক আমাদের বিপদে ফেলবার মত কিছুই সংগ্রহ করতে  
পারে নি।

—বোধহয় তা পারবেও না কোনদিন।

কথা শেষ হয়।

দীপক ভাল করে দেখবার চেষ্টা করে। কিন্তু কোণের মধ্যে দিয়ে এরা  
সম্পূর্ণে সরে যায়, দীপক এদের দেখতে পায় না।

এতক্ষণে দীপকের সন্দেহ দূর হয়। হত্যাকারী আর দ্বিতীয় হীরেচোর  
একই লোক।

নারা বাড়ি তন্ন তন্ন করে খুঁজেও হীরার কোন সন্ধান মেলে না।

অবশেষে দীপক এসে দাঁড়ায় লাইব্রেরি ঘরে। অজস্র বই সাজানো  
রয়েছে বড় বড় আলমারিতে। দালানের গায়ে পাশাপাশি লাগানো বড় বড়  
আলমারিগুলো।

দীপক জানে এখানে হয়ত সে হীরেটা খুঁজে পাবে না। কিন্তু তবুও ঘন্টা  
তিন চার ঘরে সমস্ত আলমারি সে খুঁটিয়ে খুঁটিয়ে দেখে।

বিবল, নিরুপমা, অমল, হাপি ইত্যাদি সকলেই দীপকের কাজ দেখে অবাক  
হয়ে যায়।

হাপি বলে,—দীপকবাবু যে হীরেটা নিয়েই মেতে উঠলেন বলে মনে হচ্ছে।

দীপক বলল,—হীরেটা হস্তান্তরিত না হলে হয়ত এতটা চিন্তিত হতাম না  
আমি। কিন্তু—

—হীরে হস্তান্তরের সঙ্গে বাবার মৃত্যুর কী সম্পর্ক?

—সম্পর্ক নিশ্চয়ই আছে। আমার মনে হয় চোরের উপর দ্বিতীয়বার  
বাটপাড়ি যে করেছে সেই প্রকৃত হীরেচোর।

—আপনার ধারণার কারণ ?

—কারণ কিছুই নেই। তবে অনেকটা ইন্টাইশান বলতে পারেন। পৃথিবীর অনেক বড় বড় মিস্ত্রি সলুভ্ হওয়ার মূলে রয়েছে ওই ইন্টাইশান বা অন্তর্ভবগক্তি।

—তা আমিও জানি। কিন্তু অপরাধতত্ত্বের ব্যাপারেও যে ইন্টাইশানের দাম আছে তা সত্যই জানতাম না দীপকবাবু।

দীপক কোন কথা বলে না। তাকে কেমন যেন গম্ভীর বলে মনে হয়। কিন্তু তার এই গাম্ভীর্যের আড়ালে যে অন্য কোনও চিন্তা তার মনে খেলা করছিল, তা বেশ ভালো ভাবে বুঝতে পেরেছিলেন মিঃ তালুকদার।

লাইব্রেরি ঘরে খোঁজাখুঁজি করে দীপক বলল,—আর হীরেটা পাবার আশা করা ছুরাশা। এখন যে সামান্য সার্চ বাকী আছে তা খাবার পরই শেষ করা যাবে।

খাওয়াদাওয়া মেরে দীপক গেল শোবার ঘরে। কিন্তু বিছানায় শুয়ে চুপচাপ সময় কাটাবার ছেলে দীপক চ্যাটার্জী নয়।

গভীর রাত্রি।

বাড়ির প্রত্যেকটি প্রাণী নিথর নিদ্রার কোলে নিঃশব্দে চলে পড়েছে।

প্রত্যেকটি ঘরের দরজা ভেতর থেকে বন্ধ। কারও কোন চিন্তা বা উদ্বেগ নেই যেন।

একটি মাল্লুষ কিন্তু এই ঘুমের রাজ্যের মধ্যে থেকেও অনেক চিন্তা বুক নিয়ে কাটিয়ে চলেছে রাত্রির গ্রহর।

৮:৫০.....

রাত দুটো বেজে গেল। দূর থেকে কোন একটা ঘড়িতে শব্দ তুলে জানিয়ে দিল সঠিক সময়।

লাইব্রেরি ঘরের একটা দরজার আড়ালে দাঁড়িয়ে একটা লোক যেন ক্রমশঃ অতিষ্ঠ হয়ে উঠতে থাকে।

## শ্রমের আলো

একজন লোক যেন ধীরে ধীরে এদিকে এগিয়ে আসছে না। ছায়ামূর্তিকে দেখা গেল লাইব্রেরির সামনে।

অতি সন্তর্পণে, পায়ে পায়ে ধীরে ধীরে লোকটি প্রবেশ করল লাইব্রেরি ঘরে।

তার সন্ধিগত দৃষ্টিতে সব সময় একটা আতঙ্কের ভাব ফুটে উঠছে যেন।

এক মিনিট.....

লোকটা একটা আলমারির সামনে দাঁড়িয়ে কী একটা জিনিস বইগুলোর আড়ালে লুকিয়ে রাখছে।

দরজার আড়ালে দাঁড়িয়ে থাকা লোকটা এবার নোজা হয়ে দাঁড়াল। একবার ভালো করে দেখে নিল, শরীরের সঙ্গে সংলগ্ন রিভলভারটা ঠিক জায়গায় আছে কিনা।

না, আর কোন চিন্তা নেই তার। রিভলভারটি স্থানচ্যুত হবার কোনও আশঙ্কা নেই আর। এবার সে নেটা হাতে নিয়ে এক লাফে ঘরের ঠিক কেন্দ্রস্থলে এসে দাঁড়াল।

—হাওন্‌ আপ্‌ মাই ফ্রেন্ড—তোমার লীলাখেলা আজ শেষ।

—কে? ছায়ামূর্তি নড়ে উঠল।

—উহু এতটুকু নড়বার সেষ্টা করলে মৃত্যু অনিবার্য হয়ে উঠবে মনে রেখো। ছায়ামূর্তি কী যেন ভাবে। তারপর নিজেই স্বইচ টিপে আলোটা জ্বালে, বলে ওঠে—এক দীপকবাবু, আপনি হঠাৎ কী মনে করে?

দীপক দেখে তার সামনে দাঁড়িয়ে রায়বাহাদুরের দূরসম্পর্কের ভাইপো বিমল।

## পনের

গোলমালের শব্দে বহু লোক এসে ঘরের মধ্যে জড়ো হয়েছিল। দীপক সকলের দিকে ভালো করে চেয়ে বলে,—আপনারা সকলে চলে যান এখান থেকে। আমার সাথে মিস্টার তালুকদারের একটু বিশেষ কথা আছে।

কেউ ব্যাপারটা বুঝতে পারে না।

প্রত্যেকেই আপন আপন ঘরের দিকে পা বাড়ায়।

দীপক ধীরে মিঃ তালুকদারকে বলে,—মিস্টার তালুকদার, এই নিন আপনার আসামী—রায়াবাহাদুরের হত্যাকারী। অমলবাবু যে হীরা চুরি করেছিল তাও আবার তার হাত থেকে হস্তান্তরিত হয়েছিল। তার জন্তও দায়ী এই ব্যক্তি।

—কিন্তু এ কে?

—ইনিই হচ্ছেন আপনাদের স্বনামধন্য, ত্রাস সৃষ্টিকারী দস্যু প্রলয়।

—দস্যু প্রলয়!

—হ্যাঁ। তার নাম শোনে নিন? কিছুদিন আগে যার কীর্তিকলাপ খবরের কাগজের পৃষ্ঠাগুলোকে বড় বড় হরফে অলংকৃত করেছিল—

—মনে পড়েছে বটে।

—ইনিই সেই দস্যু। আর বিমল হল ওর ছদ্মনাম।

—থ্যাক ইউ। সত্যিই আপনার ক্ষমতা আমাকে বিভ্রান্ত করে ফেলেছে মিস্টার চ্যাটার্জী।

পরদিন সকাল।

দ্রুতগতিতে সকলে জড়ো হয়েছিল দীপকের কাছ থেকে কাহিনীটা সম্পূর্ণ শোনবার জন্তে।

দীপক ধীরে ধীরে শুরু করে:

দস্যু প্রলয় হঠাৎ উড়ে এসে জুড়ে বসে। আসল ভাগনে আর ভাগনে-বউ বর্তমানে বর্মাতেই আছেন। কিন্তু এরা এমন অভিনয় করেছিল যে, কেউ মনেই সন্দেহ প্রকাশ করতে পারে নি।

## প্রলয়ের আলো

মৃত্যুর কয়েকদিন আগে রায়বাহাদুর এদের সন্দেহ করতে শুরু করেছিলেন। তাই তাঁকে প্রাণ দিয়ে প্রায়শ্চিত্ত করতে হল।

হ্যাপি এবার বলে, —দীপকবাবু, ওর স্ত্রীটিও কি দস্যু ?

—না, ভাড়াকরা মেয়েছেলে। ওর খুব বেশী শাস্তি হবে না।

এমন সময় হঠাৎ ঝনঝন করে টেলিফোন বেজে ওঠে।

—হ্যালো কে কথা বলছেন ?

—লালবাজার পুলিশ হেডকোয়ার্টার্স থেকে...

—কি ব্যাপার ?

দস্যু প্রলয় পালিয়েছে। হঠাৎ কাঁভাবে যে তালি খুলে পালাল তা বোঝা যাচ্ছে না। হয়ত তাদের দলের কেউ তাকে রেসকিউ করে নিয়ে গেছে।

দীপক হেসে বলে, —পুলিস হেডকোয়ার্টার্সে তার লোক আছে কিনা তাই বা কে জানে।

রিসিভার নামিয়ে রাখে দীপক।

মনে মনে ভাবে—সত্যিই কি জাহ্নু জানে এই দস্যু প্রলয় ?

এমন সময় একথানা প্রজাপতি আঁকা চিঠি তার সামনে এসে পড়ে।

তাতে লেখা :

প্রিয় ডিটেকটিভ দীপক চ্যাটার্জী—

আপনার বুদ্ধির তারিফ করছি আবার। কিন্তু আপনার সাথে আমার আবার দেখা হবে। প্রলয়ংকর রূপ নিয়েই এবার আবির্ভূত হব। দেখার কার বুদ্ধি বড়।

আর একটা কথা বিশ্বাস করলেন তো যে, আমার লোক সবত্র। জেগেয়া গারদেও আমাকে আটকে রাখা যায় না।

যাক আজকের মত এখানেই শেষ করছি। কার্ষক্ষেত্রে আবার দেখা হবে। ইতি—

দস্যু প্রলয়।

—শেষ—

## ❁● বিশ্ব-চক্র সিরিজ ●❁

স্বপ্নকুমারের ডিটেক্টিভ গ্রন্থমালা—প্রত্যেকখানির মূল্য দুই টাকা।

- ১। অদৃশ্য সংকেত    ২। দূরস্বার ছল    ৩। দ্রান্তপথের শেষে    ৪। চলন্ত ছায়া  
 ৫। হিংসার অন্ধকার    ৬। অব্যর্থ সন্ধান    ৭। বিষাক্ত হাসি    ৮। মিথ্যা চমক  
 ৯। চায়না লজ    ১০। বিজয়িনী তন্দ্রা    ১১। শ্বেতপদ্ম    ১২। অদৃষ্টের পৰিহাস  
 ১৩। পৃথিবী থেকে দূরে    ১৪। হারানো ডায়েরী    ১৫। বিকেল ছাটার শোভে  
 ২০। বিফল স্বপ্ন    ২১। বাগানবাড়ি    ২২। প্রবালপুরী    ২৩। জীবন-মৃত্যু  
 ২৪। গুরপারের পৃথিক    ২৫। জমাত অশ্রু    ২৬। পরাজয়ের গ্লানি    ২৭। আলো-আঁধার  
 ২৮। তিন বন্ধু    ২৯। ছায়ার আতঁনাদ    ৩০। রাজ্যজবা    ৩১। এক পেয়লা চা  
 ৩২। বেনামী চিঠি    ৩৩। রক্তমালার কাহিনী    ৩৪। ঝড়ের সংকেত    ৩৫। জ্বলনবন্দী  
 ৩৬। ব্যর্থ অভিযান    ৩৭। হাবানো মাণিক    ৩৮। অদৃশ্য বন্ধু    ৩৯। হরতনের নওলা  
 ৪০। গহপ্রবেশ    ৪১। জোয়ার ভাঁটা    ৪২। বেআইনী দখল    ৪৩। কৃপমহল  
 ৪৪। পরশ পাথর    ৪৫। চোখের ভুলে    ৪৬। চারশো বিশ    ৪৭। বিন্দি সূতো  
 ৪৮। বিষকন্যা    ৪৯। শব্দে দাঁট হাত    ৫০। সন্ধ্যামালতী    ৫১। বন্দী বাসুন্ধী  
 ৫২। শেষ বাতের কাহিনী    ৫৩। বলয়গ্রাস    ৫৪। মায়াকানন    ৫৫। ছন্দহারা  
 ৫৬। ছন্দবেশী    ৫৭। তেরো নম্বর বাড়ী    ৫৮। বিন্দিণী বিশাখা    ৫৯। একটি চোখের  
 রহস্য    ৬০। মৃৎজর্জী ভিলা    ৬১। চীনের পতুল    ৬২। কালো মৃৎখোশ    ৬৩। গ্রীণ  
 ড্রাগন    ৬৪। নাইট ক্লাব    ৬৫। সোনার হরিণ    ৬৬। তিন নম্বর ফ্ল্যাট    ৬৭। ঘণি  
 হাওয়া    ৬৮। বিষের বাঁশী    ৬৯। ভাড়াটে বাড়ি    ৭০। ঘুম ভাঙা বাত    ৭১। শেষ  
 অন্ধ    ৭২। লাল কুঠী    ৭৩। নিশি মালগু    ৭৪। পগল হাওয়া    ৭৫। ঝরা বকুল  
 বাংলা    ৮০। কাঁটা ও কমল    ৮১। প্রলয়ের আলো    ৮২। জীবন দোলা    ৮৩। শ্রাবণী  
 ৭৬। চৈত্রের পলাশ    ৭৭। সাগর বেলায়    ৭৮। আগাবিক রশ্মি    ৭৯। পাহাড়তলীর  
 সন্ধ্যা    ৮৪। সীমান্ত ষড়যন্ত্র    ৮৫। রক্তকরবী    ৮৬। অদৃশ্য পথেরকা    ৮৭। অজস্র  
 গডের রহস্য    ৮৮। পলাতক আসামী    ৮৯। আঁধার রাতের পৃথিক    ৯০। আঁধার রাতের  
 আতঁনাদ    ৯১। রহস্যময় নিশাচর    ৯২। গহন রাতের অটহাসি    ৯৩। রুইতনের টেকা  
 ৯৪। ময়দানের রহস্য    ৯৫। জিরো নাইন    ৯৬। ভ্রমরের কাষা  
 ৯৭। অস্ত্রোপাশের অটহাসি    ৯৮। চক্রান্তের বিভীষিকা    ৯৯। নাগিনী কন্য

১০০। নীল পাথরের চোখ।